

Q. F. F. Q. S.  
DISSERTATIO POLITICA  
De

# IUSTITIA ARMORUM ADVERSUS BARBAROS,

QUAM

Amplissimæ Fa-  
cultatis Philos. in illustri ad  
Salam Academia,

SUB MODERAMINE

VIRI AMPLISSIMI

DN. JOHANNIS ARN-  
DII BELLMANNI,

Eloqu. Prof. Regii,

ad Publicum Examen modestè defert

ELAVUS J. M. G. WERML.

Wermli.

Audit. Gustav. Majori ad d. 4. Martii  
Anni MDCCIX.

PSALIAE, typis WERNERIANIS.

*Leichnag. 1*

*Reverendissimo in CHRISTO*  
*PATRI AC DOMINO,*  
**D. TORSTANO**  
**RUDEEN,**  
Per Wermelandiam &  
Daliam Superintendenti gra-  
vissimo, longeque meritissimo  
Mæcenati maximo, submissâ a-  
nimæ veneratione ætatem  
suspiciendo.

**Ω**ς ἐν ἐπισήμαϊς, ἐν τεῦθεν κυδιανειρῆς  
 Ἐξ Ακαδημίας, σπεδῆς φέρον ἄλλοι  
 ἀμᾶλλας  
 Μεσοπόλοι· κῆ ἔγωγε ἐμᾶς μὲν τάςδε  
 ἀπαρχὰς  
 Ἐς πόλιν ὑμετέραν ἀτελεῖς ἄγω. ἔλπό-  
 μενος δ' εὖ,  
 Εἰ πολυφύγῃς δὰς Σέοθεν καλᾶγχα  
 ἐμοῖν' ἦ,  
 Κάλλιμον ὃς Φάος εἶ, Πάτερ' Αἰδεσιμώ-  
 ταίε πάτρας.  
 Τῶς τεὸν ἔρανήν λαμπρὰς βίοτον περι-  
 λάμψει,  
 καὶ τριγέρον πρὸς ὄλυμπον ἰὼν αἰεὶ ἀ-  
 γλαὸς ἔσση.

Reverendissimi Nominis  
 Tui

Cultor & Cliens de-  
 votissimus

Ε. ΣΤΥΡΓΙΩΣ.

Pl. Reverendo Praclarissimoq; Domino,  
MAG. SVENONI  
VIGELIO,

Pastori in Fryssdalen laudatissimo,  
Præpositoque dignissimo, Promo-  
tori meo ad cineres usque piâ  
mente prosequendo.

*Pro grege qui Christi vigilas, Pracla-  
re VIGELI,*

*Barbara quo feritas sit removenda  
procul;*

*Nonnisi placatos suscollas luminis orbes  
In vigiles Musas, excubiasve meas.*

*Quis, ut mansuetis, defendo minantia  
pœnas*

*Martia Christicolum gentibus arma  
feris.*

*Nam quamvis tuear tam turpes, quas-  
que relegas;*

*Est tamē hic nobis aspera pugna minus.  
Excipias igitur factum hoc pro tot bene-  
factis,*

*Atque ut cœpisti, perge favere Tuo*

*Præclar. Dn. Præposite,*

*observantissimo cultore*

*E. F.*



Reverendo atque Doctissimo Domino,  
DN. S V E N O N I  
R U D E E N ,

Scholarum trivialium, quæ Carol-  
stadii vigent, Collegæ vigilantissi-  
mo, Fautori & Amico ex-  
optatissimo.

*Corde colende pio semper mihi, Candi-  
de Fautor ,*

*Wermidiacæ terræ, delictumq; meum,  
Injustis exscribo tuum nunc nomen in  
armis;*

*(Quæ spoliant gentes jure, domoque  
suâ)*

*Nec temere. me quippe, tuo qui totus  
in ære*

*Sum , vel sic decuit, ne officiperda  
forem.*

Tibi

Rev. & Doctissime Domine,

*omni officiorum genere  
obstrictissimus*

EL. Fr.

Wållachtad Man  
OLOF KNUSSON/  
Min Høgtårade f. Fader /

Går / med Guds hjælp / nu Ehr myckne möda  
winna

Den hugnad / som J förr / än jag i lindan låg /  
Høgt dñstet; uår af mig der til ett prof J finna /  
Fast ringa / men ei tänckt först iag wår Carl-  
stad såg.


Gud / som alt lagar wåhl / fullbordar / hwad än  
selar

Til det Ehr tencka måst sin sågnad systar på;  
Då wa får bättre prof / om ddet of ei delar /  
Framwijsa af det wett / iag kan ock kunnat nå :  
Når af min ödmuikhet ock lydno bñst kan dömas  
Om all Ehr trågna flit utt wår lufwa bygd;  
Och Wermeland et meer af stogar skal berömmas /  
An des gemena folk för ei gemener bygd.

Min Høgtårade f. Fader /  
Eder

Lydigste Son

EL. JONSSON.



A. Ω.


## CAP. I.

### De Socialitate Gentium.

- §. I. *Ostenditur unitas generis humani.*  
§. II. *Humanum genus in varios cœtus transfiguratur.*  
§. III. *Idem rursus per consociationem sub divino imperio conjunctum adumbratur.*  
§. IV. *Gentes aequalitate juris gaudere, demonstratur.*  
§. V. *Servitus naturalis negatur.*  
§. VI. *Status gentium naturâ pacificus monstratur.*  
§. VII. *Oritur bellum, emulatione, ambitione, & avaritiâ quietem humani generis turbantibus; maxime inter eos, qui moribus, institutis, & religione discrepant.*

A

§. I.



Uum in mundum  
introduceretur, cui  
sublunarium rerum  
possessio cederet,  
humanum genus,  
ἐποίησεν ὁ Θεός, ( ut verbis utar τῶ  
σκέυς ἐκλογῆς, Apostoli Pauli ) ἐξ  
ἐνὸς αἵματος πᾶν ἔθνος ἀνθρώπων κατci-  
κεῖν ἐπὶ πᾶν τὸ πρόσωπον τῆς γῆς a).  
Unde factum est, ut ex naturæ qua-  
dam similitudine, communique  
stirpe, & sorte, homines inter, ceu  
dominos terræ, haud vulgaris re-  
sultaret Φιλανθρωπία, eosque blan-  
do amoris affectu inter se concilia-  
ret. Id quod eleganter non minus,  
quam verè differuit Philosophorum  
princeps, his verbis : ἐπεὶ τὸ κατὰ  
Φύσιν ἡδὺ, τὰ συγγενῇ δὲ κατὰ Φύσιν  
ἀλλήλοις ἐστὶν, ἀπαντα τὰ συγγενῇ  
ἢ ὅμοια ἡδέα, ὡς ἐπὶ τὸ πολὺ οἶον  
ἄνθρωπος ἀνθρώπῳ. b) Instruxit in-  
super homines æque omnes social  
vita

vitæ aptissimis facultatibus, & ut  
ore Clementis Alexandrini loquar:

Φύσει κοινωνικὸς, καὶ δίκαιος ὁ Θεὸς ἡμᾶς  
ἐδημιούργησεν. c) Rationis enim lu-

men, virtutum semina, legemque  
pacifico statui congruentem singu-  
lis mentibus hominum impressit;  
nec non concessit sermonem, ὅς ἐπὶ  
τῷ δηλῶν ἐστὶ τὸ συμφέρον καὶ τὸ βλα-  
βερόν, ὥστε καὶ τὸ δίκαιον, καὶ τὸ ἀδίκον.

d) Ac plane omnia corporis mem-  
bra societati colendæ, & mutuis  
officiis præstandis maximè idonea  
efformavit, atque destinavit. adeo  
ut communium harum, aliarumque  
rerum intuitu, naturam esse socia-  
lem inter homines collegerim, at-  
que hujus generis, per totum or-  
bem diffusi, æqualitatem, unitatem  
perpetuam, pacemq; & amicitiam u-  
niversalem, ac naturalem, cum sanio-  
ribus recte concluderim. Cujus con-  
junctionis ut supremus ille rerum  
arbitrator auctor, statutorque est; ita  
propter vinculum, quo mortales

confociavit, non male huc aptes illud, quod alioqui de corpore Christi mystico gentium Apostolus pronuntiavit: ἐξ ἧ παντὸ σώμα συναρμολογούμενον ἢ συμβιβαζόμενον διὰ πάσης ἀφῆς τῆς ἐπιχορηγίας, κατ' ἐνέργειαν ἐν μέτρῳ ἑνὸς ἑκάστου μέρους τὴν αὐξήσιν τοῦ σώματος ποιεῖται, εἰς οἰκονομίαν ἑαυτοῦ ἐν ἀγάπῃ. e)

a) Act. 17. v. 26. b) Arist. Rhetor. l. 1. c. 2. c) lib. 1. Strom. fol. 286. cit. Zentg. d) Arist. 1. Pol. 2. e) Eph. 4. v. 16.

## §. II.

Ceterum, licet hanc ob causam primævus familiarum status naturâ pacificus fuerit: tamen propter multum, quo ille laborabat, imperfectionis, non externa amplissimi huius corporis uniformis facies diu stare potuit. Namque paulatim magna simplicitate h. e. ἀφθαρσία, ὅ eximia in alios caritate, blandioris puta amicitiae sensu, exollescente, metus exsistere cœpit; si  
mul

multiplicato genere humano, cum  
 ob occursum circa easdem res oc-  
 cupandas, tum per quorundam  
 effrenem augendæ rei familiaris  
 aut potentiæ libidinem, & *παρεργίαν*,  
 ex animo, aut affectibus præpedito,  
 aut boni malique mixtione confu-  
 so propullulantem, rixæ, inimici-  
 tiæ, & injuriæ exortæ fuerunt. Qui-  
 bus sedandis & refrænandis, quia  
 sola lex naturæ, quantumvis in se  
 perfecta, haud suffecerat: non po-  
 tuere non homines in varios coale-  
 scere cœtus, se suasque vires con-  
 jungere, de magistratibus consenti-  
 re, & ad naturalem libertatem con-  
 tra quosvis iniquè injurios defen-  
 dendam conspirare. Unde intelligen-  
 mus, & obiter observamus ex illo  
 consensu nullum unquam hominem  
 fuisse totius mundi dominum; nec  
 non discimus fines regnorum &  
*proprietates gentium aut pacto quo-*  
*dam expresso, ut per divisionem, aut*  
*tacito, ut per occupationem fuisse intro-*  
*ductas.*

*ductas. f)* Huic vero principali civitatis constituendæ causæ, *g)* si etiam addideris illud (ut plane hic omittamus suspicionem Pufendorffii de primis coloniis *h)* quod homines, utpote ζῶα πολιτικά, sive naturâ ad civilem societatem apti, adeo ut non tantum ea, quibus indigerent, *ope mutua facilius consequerentur, i)* sed cognitione etiam rerum divinarum, humanarumque, & quarumvis artium peritia eò melius perficerentur, *virtutibusque operarentur*, illum statum appetiverint: videbis certè civitates esse constitutas, ut homines protecti, & *sanctis rectisque legibus gubernati bene beateque viverent. k)*

*f)* Grot. de J. Bell. & P l. 2. c. 2. §. 2.

*g)* Puf. de J. Nat. & G. lib. 7. c. 1. §. 7.

*h)* Introd. ad hist. cap. 1. §. 2. *i)*

Reinhard. Rœnia Theatr. pol. trip. part.

1. c. 2. §. 13. *k)* Chrysost. Javell. Cant.

lib. 1. in Pol. Ar. cap. 1.



## §. III.

Ista vero divisio eò minus tollit unitatem humani generis, ejusque conjunctionem naturalem, quò magis illa vim suam per particulares istos coetus, eos etiam in unum corpus cogendo, exserit. Quamquam enim civitatum, à se invicem distinctarum, unaquæque suam salutem procurat, & proprium conservare statum satagit: non tamen amittitur plane socialitatis natura, naturalisque legis obligatio, quin hæc, ceu æternum societatis vinculum, omnibus & singulis membris firmiter infixum, illas, ne perpetuis involutæ præliis se ipsæ invicem conficiant, in universalem societatem sub divino cogat imperio. *Van enim & effectum sortitur isthac obligatio ex ipsa ratione rerum: & communis gentium securitatis, cujus utique stator censetur ac vindex, Deus Opt. Max. l)* ut verba sunt Celeb. Prof. Lundii, viri de hoc Athenæo & patria

& patriâ simul præclarè meriti, Patroni mei summi. Hinc igitur omnis gens moratior suam voluntatem & sententiam gubernatori rerum omnium, atque omnis violati juris vindici gravissimo subjicit; quemadmodum boni cives legi civitatis. uti loquitur etiam Epictetus: ὁ καλὸς, καὶ ἀγαθὸς, τὴν αὐτῆς γνώμην ὑποτέταχεν τῷ διοικῶντι τὰ ὅλα· καὶ ἅπερ οἱ ἀγαθοὶ πολῖται τῷ νόμῳ τῆς πόλεως. *m*) Sumus etiam cives, quamdiu communitas manet, mutuis complexibus unum corpus efficientes, secundum illud Antonii Imperatoris: εἰ ὁ λόγος ἡμῶν κοινός, καὶ ὁ νόμος κοινός· εἰ τῆτο, πολῖται ἔσμεν· εἰ τῆτο, πολιτεύματος τινὸς μετέχομεν· εἰ τῆτο, ὁ κόσμος ὥσανει πόλις ἔστι. *n*) Cujus rei ut omnes conscii, cujuscunque sunt demum religionis; ita injuriam passi semper ingeminant illud Homeri. *o*) Ἐχει θεὸς ἔκδικον ὄμμα. vel potius Hesiodi: *p*) Πάντα ἰδὼν Διὸς ὀφθαλμός, καὶ πάντα νοήσας,

Κα

Καὶ νῦν τὰδ', αἰκ' ἐθέλησ', ἐπιδέρεται.  
 ἔδ' ἔ λήθει

Οἴην δὴ καὶ τήνδε δίκην πόλις ἐντὸς  
 ἔέργει.

l) *Zamolxis c. 9. §. 8. m) vid. Zent-  
 grav. de just. & jur. sect. 1. art. 1. subs.*  
*1. § 7. n) Idem de J. G. orig. art. 1.*  
*§. 31. cit. l. 4. 24. o) Batrac. 1. v. 69.*  
*p) Opera & dies v. 265. &c.*  
 §. IV.

Hinc liquido constat, qualis sit  
 status gentium, & quæ jura illum  
 consequantur; scilicet ut socialitas  
 remanet, ita & inter eas æqualitas,  
 quæ uniuscujusque mutui officii  
 mensura est. Namque gentes, qua-  
 tenus altera alteri subiecta non est,  
 nec dum jus aliquod, intercedente  
 pacto, uni in alteram acquisitum,  
 gaudent æquali jure & libertate;  
 ita ut ex suo arbitrio & judicio, si-  
 ne injuria tamen alterius, sui con-  
 servationi & incrementis velificari,  
 & quæ ad formam suæ reipublicæ  
 pertineant, agere, disponere, & li-  
 bere

bere res quasvis suas administrare possint. Nimirum *mortales in diversas gentes coadunati mox plena usi sunt libertate, facti, extincto Noacho, sibi invicem pares, solo Deo inferiores.* q) Atque exinde prono alveo fluit hæc prima gentium obligatio, ut eadem invicem præstent officia quæ ab aliis expectant, nihil sibi met ipsis, vel propter intellectus perfectionem, vel vitæ integritatem, auctoritatis in alteram vindicantes. Adeoque hanc *ἀνταρθεσίαν ἐπὶ παντί* non potentia & vires dispares, r) vel concessio s) dignitatis cujusdam aut prærogativæ, sed singulare pactum & ultronea subiectio imminuunt.

q) *Zentgr. de J. G. orig. art. II. §. 45.*  
 r) *Art. 3. §. 10. s) §. II. & Art. X. §. 19. & 20.*

### §. V.

Ergo ut hanc juris æqualitatem differentia, quæ est inter incultiores & moratiores gentes, quodq;  
 discrepan-

discrepantiæ inter hebetiores & ingenio perspicaciores intercedit homines, non tollit : ita sententiam Aristotelis ut *humano generi periculosam*, t) plane explodendam & rejiciendam cum Pufendorffio, u) ceterisque judicamus. Etsi enim Zentgravius, sequutus forte Franciscum a Victoria, testatur, x) quod licet Aristoteles natura dari servos dixerit, de serviendi tamen aptitudine & servili ingenio, non de eo, quod jus naturæ sanciat, Philosophum loqui, dudum alii monuerint : hujus tamen *δεδολογησίου* probatur non solum ex dicto Poëtarum ab ipso adducto & probato : *διὸ Φάσιν οἱ ποιηταὶ, βαρβάρων δ' ἑλλήνας ἄρχειν εἰκόσ. ὥς ταυτὸ φύσει βάρβαρον, καὶ δέλον. γ)* verum etiam verbis antecedentibus clare ostendisse mentem suam circa jus ipsum, mihi quidem videtur : *τὸ μὲν γὰρ δυνάμενον τῇ διανοίᾳ προορᾶν, ἄρχον φύσει, καὶ δеспόζον φύσει τὸ δὲ δυνάμενον τῷ σώματι*

ματι ταῦτα ποιεῖν, ἀρχόμενον καὶ Οὐσεί  
 δῆλον. z) *Nam quod mentis agitatione  
 providere potest, imperandi jus habet  
 naturâ, & dominatur naturâ: quod au-  
 tem potest corpore imperata facere, id  
 imperio alterius parere, & servire  
 debet naturâ.* Verum, brevitati nunc  
 litans, istam servitutem infra, ubi de  
 causis belli agendum erit, pluribus  
 fortasse excutiam; sufficit in ante-  
 cessum hoc duntaxat libertati natu-  
 rali subjunxisse, non ob genium  
 servituti aptum, vi. vel sine consen-  
 su, in isto statu aliquem collocari  
 debere. a)

t) *Ad. Contz. 10. c. 8. §. 2.* u) *De J.  
 Nat. & G. l. 3. c. 2. §. 8.* x) *De orig.  
 Jur. G. Art. 6. §. 6. & Fr. Vic. rel.  
 5. Sect. 1. ad finem.* y) *1. Pol. c. 1.*  
 z) *eod. cap.* a) *vid. Puf. supra cit. loc.  
 §. VI.*

Quoniam hætenus vidimus in-  
 tegros cœtus, æque ac homines  
 singillatim spectatos, sociales esse,  
 atque æquales; sequitur nunc pro  
 ratione

ratione instituti, ut paucis originem belli discutiamus, & qualis, relate ad alios, uti ajunt, status gentium sit. Nobis autem in eo occupatis, quo planior via pateat, ante omnia Hobbii periculosa sententia removenda est. Hic enim cum statuerit, in *statu naturali jus omnium esse in omnes, & unicuique licere quaecunque & in quoscunque voluerit b)*; non potuit etiam non affirmare, *bellum sua naturâ esse sempiternum. c)* Cujus è regione nos positi, sicuti fundamento longe præstantiori systema hujus universitatis innixum, idque vinculo quodam justitiæ universalis, ad nemini lædendum, sed suum cuique tribuendum, æqualiter constrictum novimus; ita non alium gentium naturâ statum, quam *eternam pacem d)* esse, & propter cognationem, communemque earum salutem, atque æqualitatem, tale inter illas commercium pacis intercedere de-

re debere, quo etiam remotissimæ ab omni in perpetuum injuriâ liberæ sint, & nisi ipsæ contrario facto amicitiam diffuerint, amice tractentur, omnino contendimus. Hoc autem commercio per injurias alicujus soluto, non statim vinculum pacis sublatum, nec vim vi repellere est illegitimum: sed tunc illud Æmilii Probi (sive cujus demum cunque est) *Pax pariter bello*, e) locum obtinere, sanis dudum & eruditis sese probavit.

b) *Hob. de Cive. lib. 1. §. 10. & 12.*

c) *ibid. §. 13.* d) *vid. Zentgr. de or. 7. G. Art. 3. §. 18.* e) *vulgo Corn. Nep. in vit. Epam. c. 5.*

## §. VII.

Status itaque subsidiarius bellum est, f) quo armis, quod jure non potest, transigatur, & id, quod cuilibet debetur parti in vita sociali, obtineatur. Quam ob causam non minus, quam ceterorum Imperatorum, illud Antonini Bassiani  
 Cara-



Caracallæ symbolum æstimandum est: *omnis in ferro jalus.* g) Quum vero hic belli finis sit, satis apparet, neque eo tempore omne humanitatis exercitium quiescere, sed secundum regulam, paritati omnium æqualiter consulentem, cuncta peragi debere. Et quo melius illud vigeat, *quanquam præcepta naturalia ante omne fœdus obligare recte censeantur*, neque per id obligatio ad pacem universalem reddatur arctior: h) tamen pactis illud insuper roborari & dirigi cautis placuit, & perversorum injurias expertis hominibus. Unde jus, quod vocant, Gentium, propullulat, & fidem publicam, vel tacite vel expresse datam, contra immanitatem, & pacis recuperandæ obstacula, ubique terrarum urget. Interim verò tantò minus quisquam inficias iverit, quin gentes quædam, tanquam rationis recto usu destitutæ; æquam & almam pacem injustis sæpe bellis,

lis, deprædationibus & latrociniis  
 dissolverint; cum etiam necessum  
 habuerit vir illustris de Pufendorf  
 conqueri, hodiernum ambitionem  
 & avaritiam eo usque validis sti-  
 mulis mortalium animos subigere,  
*ut ne mansuetissima quidem doctrina*  
*Christi inter Christianos insidias, bella,*  
*atque oppressiones exstinguere queat. i)*  
 Cujus rei causas, præter dictam  
 alienis imminentem cupidinem,  
 cum ex habituum externorum, &  
 pro temperamento cœli, soli, & ci-  
 bi, ingeniorum diversitate; tum  
 maximè morum, institutorum, &  
 religionis varietate invicem exor-  
 tum contemptum; nec non, proce-  
 dente tempore, multis cladibus &  
 mutuis auctum damnis naturale  
 velut odium constituimus. In quas,  
 justæ-ne an injustæ fuerint, lumina  
 mentis intensus, quale gentium  
 circa mores & religionem disci-  
 men sit, primò inquirendum pro-  
 posui.

f) Zentgr.

- f) Zentgr. de orig. J. G. Art. 3. §. 17.  
 g) Kromay. hist. eccl. centur: 3. h) Pufendorf. de Jur. Nat. & Gent. lib. 2. c. 2. §. 11. i) Idem lib. & cap. cit. §. 12.

## CAP. II.

### De Discrimine Gentium.

- §. I. Gentes distinguuntur in barbaras & moratiores, in Gentiles & Christianas, atque verè Christianas & hæreticas.  
 §. II. Quenam Christianæ & moratæ sint, monstratur.  
 §. III. Voces gentis & hæretici ex penduntur.  
 §. IV. Vox barbari.  
 §. V. Barbaries certis notis ab humanitate disjungitur.  
 §. VI. Quanam sint barbara gentes.  
 §. VII. Cause barbarici adferuntur.  
 §. VIII. Omnes sibi ipsis in suo errore placere, idque esse impedimentum inducendæ cultiori vitæ, monstratur.  
 §. IX. Notiones de Deo communes & necessariae, ut fundamentum fidei omnis & juris jurandi, ostenduntur.

B

§. I.

## §. I.

**N**on attinet hîc gentes, quatenus vel potentiores sunt, vel infirmiores, discernere; cum omnibus primâ fronte perspicuum sit, id discriminis nullius imperio jus quoddam tribuere. Igitur ad illud, ex quo acriores exsistentes sententias, Philosophorum alter alterius instantius propellere & sistere cœperunt, appropero. & si gentes pro gemino officiorum fonte duplici modo consideravero, haud frustra me ominor facturum. Namque, quatenus vitam civitatemque suam bonis moribus, honestisque disciplinis ac literis, ex præscripto voluntatis divinæ jure naturali saltim manifestatæ, vel instituunt, vel minus; moratæ, aut barbaræ dici sueverunt: quatenus autem doctrinam cœlitus revelatam amplexæ sunt, vel secus; in populum DEI, ut audiebant olim Israëlitæ, seu post orbem redemptum in Christianos, & gentiles recte di-  
vidi

vidi, adseritur. Illud verò dictum volo; non in universum Christiani nunc nominis participes pro moratoribus haberi, nec omnes, quotquot fuerunt gentiles, barbarorum nomen fuisse meritas. Rursus Christiani, quā religionem, non ejusdem sunt ordinis & dignationis, sed præter veros, sub istius sanctissimi nominis Christi umbone latitant, hæretici, *veritati divinitus revelatæ contrarii, & salutis fundamentum evertentes*; k) ideoque ceteris peregrinis non multo meliores.

k) J. And. Quensted. Syst. Theol. part. 1. de Theol. in gen. Thesi 2. not. II.

## §. II.

Hoc equidem ipsa indoles vobis quemque docet; quam, licet omnibus notam, tamen in re præsentanti, ne quis me mancum appellaret, summi mihi breviter explicandam. Ut igitur Christo nomen detur Christianus, ita nec plures, nec

B 2

pauciores

pauciores isto includuntur nomine, quam qui in sanctissimo Triuni nomine baptizantur, Christumque humani generis servatorem confitentur. Ut eo modo, præter gentiles sive Paganos, etiam Judæos & Turcas; non vero Moscos, Græcæve ecclesiæ addictos, quantumvis maximâ ex parte barbaros, cum ceteris hæreticis, exclusos reputemus. Sic fere de morato: ita enim ex moribus, de quibus docti agunt non prout deprehenduntur, sed prout esse debent in vitâ humanâ æstimatio fit & appellatio. Unde gentes, quæ cultioris vitæ usu humanitate puta, æquitate, mentisque culturâ florent, h. e. sociali naturæ congruenter vivunt (scilicet in quantum fert humana infirmitas *neminem enim natura mortalium tam conditis moribus finxit, in quo non aliquid desideres, velut ultimam artificis manum* m) illæ moratarum, v plerumque à Philosophis, in cor  
par

parationis gradu, morationum titulo insignitæ leguntur. Græcos igitur antiquos & Romanos, ( ut Chaldæos & Ægyptios, quasi nescius vitæ eorum, subiticeam ) gentiles quidem recte, barbaros non item dixeris; nisi fortè, comparatione quadam religionum eos ita deprimente, illos barbaros, ceterosque barbariores quis appellaverit. Videlicet Græcia, quanquam hodierno tempore subsidens ejus industria variâ non solum superstitionis caligine, sed & barbarie Turcicâ, velut nube quadam obducta est, *ut nulli ipsis dolentius ad majorum memoriam suspirent, à quorum ingeniis exciderant: n)* tamen iis quondam moribus enituisse, eâque omnigenæ doctrinæ, scientiarum & artium culturâ splenduisse fertur, ut omnis olim humanitatis cultu exornatam fuisse putes. Quò facit illud Poëtæ: o)

*Primæ frugiferos fœtus mortalibus*

*agris*

B 3

*Dididerunt*

*Dididerunt quondam præclaro nomine Athenæ:*

*Et recreaverunt vitam, legesque rogarunt:*

*Et primæ dederunt solatia dulcia vitæ.*

Romæ etiam sub Augusto compositæ si florentem statum spectes, scientiam, eloquentiam, Poëtarum suavitatem, & sapientiæ specimina cuncta, quæ prodidit; virosve, quos in deliciis habuit, eruditissimos: dices fortean cum Barclaio: secutas ætates sæpe de antiquâ venustate excidisse, & mores quoque interdum ad barbariem, si non illam feram, tamen quæ obtusa ingenia spissaret. p)

m) Barclai. *Icon. anim. c. 2. n) & p) ibid. o) T. Lucretius Carus de rerum natura lib. VI. v. 1. 2. 3. 4.*

### §. III.

Gentiles, pro numine rerum inanium ac simulacrorum cultores, a gens dicti sunt; quod tamen vocabulum



cabulum sæpius Ecclesiasticis tantundem valet; etsi proprie est populus sui & ab aliis discreti generis, à genus, (quod à gignere est,) derivatum. Ubi obiter notandum, omnes homines recte genus humanum nuncupatos, quod ad unum hominem sua cujusque geniti refertur origo. Gentis igitur hæc & gentilis notio ecclesiæ Judaicæ videtur accepta referenda, quæ ipsa unius tantum nationis seu gentis, cum sola verum Deum coluerit, omnes vero ceteræ falsos; non potuerat non omnes paganos atque ethnicos propter multitudinem gentes nominare. Hebræis enim & Judæis *גוים* gentes, & *יחיד* singulariter, iisdem usurpatur significationibus atque *gens* apud Latinos. Rursus hæretici audiunt, qui sectam aliquam à verâ religione alienam instituunt aut sectantur, quasi non recto judicio electionem fecerint: *אֵלֶּיךָ* enim, *eligo*, radix *אֵלֶּיךָ*, & inde

de αἱρεσις electio. Αἱρέσεως autem dictionem Budæus probat apud veteres non ita odiosam fuisse, variis locis citatis, ut nunc apud Christianos: quibus cum summa competat concordia, utpote ejusdem corporis membris, jure optimo invisum est hæreseos seu sectæ vocabulum, divisionem significans. q) Hos si recenserem & fusius describerem, nihil aliud facerem. quam γλῶσσας εἰς Ἀθήνας. Satis ergo sit, hæc ob varias pro varietate gentium circa bella sacra subortas quæstiones indigitasse.

q) vid. Lex. Græcol. αἱρεσις.

§. IV.

Hic autem barbari examinandi plus mihi faceffunt negotii; quippe quorum inprimis incerta appellationis ratio est. Quatuor completur Cicero notiones his verbis: neque tam barbari lingua & nationi illi, quam tu naturâ & moribus. r) Unde in diversas abierunt Etymologici sententias, deducentes ali

vocabulary

vocabulum à βαρβαρ, absonâ voce, in quam peregrini homines Athenis, cum primum Græcè loqui conarentur, sæpius inciderint : qui sunt, quos ego vidi, Budæus s) & quem auctorem ei fuisse suspicor, Strabo, pluribus hanc sententiam persecutus. t) Quibus quoque addimeretur Ἐρὸς apud Aristophanem, qui ait, aves antequam eas loqui docuisset, barbaras fuisse ; teste Suidâ, qui barbaros exponit : μὴ εἰδότες ἄλλων ἀνθρώπων φωνήν. Βαρβαρισμός δὲ ἐκ τῶν κακιῶν λέξις ἐστὶ παρὰ τὸ ἔθος τῶν εὐδοκίμούντων ἑλλήνων. u) Aliis Barbaricæ religionis nomen est, ut Epiphanio, illud ex Epistola Pauli colligenti, & quatuor sectas constituenti, Ἰουδαϊσμόν, ἑλληνισμόν, Σκυθισμόν, & βαρβαρισμόν. Verba Apostoli hæc sunt : ω) ὅπερ ἐκ ἐνὶ ἑλλην ἢ Ἰουδαῖος περιτομὴ ἢ ἀκροβυστία· βάρβαρος, Σκύθης· δούλος, ἐλεύθερος. Alii ut Vossius x) & Janus Coldingius y) *barbari* ab Arabico

bico *Bar, desertum*, vel more Ebræorum *barbar, valde desertum*, computarunt natales. Vel denique à Chaldæo בַּר *extra, foris*, cui simile est בְּרָא, silva sive ager incultus, derivatam opinantur. Quæ sententia, quoniam inter eruditos constat, z) culturam morum & literarum in iisdem terris primum viguisse, & inde ad Ægyptum ac Græciam inter alia commercia olim pervenisse; haud à vero abludit. Significat itaq; *Barbarus* in suo sensu & usu extraneum non tantum, sed & peregrinum, propter indecoram vitam invisum, sive ab humanitate alienum. Cur barbariæ nomen totius Africæ maritimo tractui, ab Ægypto ad fretum Herculeum excurrenti, inditum sit, ἵνα μὴ κινῶ ut dicere solent, χορδὰς τὰς ἀκινήτας, jam quærere supersedeo.

r) in *Verr. l. 4. c. 51.* s) *Lex. Græcol.* t) *lib. 14. Geog.* u) *Suidas in voce βαρβαρίζει.* w) *Ep. ad Coll. 3: 11.* x) *de Vit.*

*Vit. Serm. c. 1. y) Etymol. z) vid Voss.  
de sect. Phil. c. 1. & Th. Stanl. Hist.  
Phil. orient. l. 1. proœmium.*

§. V.

Siquidem verò præcipuus noster sermo de barbaris sit, non utique prætermittere debemus, quin altius, quinam isti sint, inquiremus; & cum id non secundum cuiusque confessionem, aut aliarum accusationem pronunciandum sit, a) certis quibusdam notis feritatem ab humanitate disjungamus. In quibus describendis si ductum sequutus fuerim Joh. Gerhardi, ubi gentilismum deserto assimilatum tribus de causis asserit & depingit, b) videor id meo quodam jure fecisse. Utenim hic ponit. 1. *Sterilitatem*, bonarum nempe actionum quæ Deo placeant: sic etiam barbarismi principem notam morum & vitæ fœditatem constituo. Ubi videlicet homines ad actiones bonas, quæque rationali & sociali naturâ dignæ sint, inepti

inepti offenduntur; & lubidini potius contumacis appetitus, quam rectoribus rationis dictaminibus obsequentes; jusque in armis & robore habentes, rabiei ferarum haud multo absimilem agunt vitam. Apud quos pro candore virtutis impetus, *c*) pro pace deprædatio *d*) grassantur; nec non quæ Poëta abominatur: *e*)

- - *Tristes habitus, f) obscenaq; visu Corpora; mens duro numquam cessura labori;*

*Præda cibus, vitanda Ceres, fratresque necare*

*Ludus, & occisos pulcrum jurare parentes.*

Ex barbaris vero actionibus pessimæ putantur, esus carniū humanarum, *g*) liberorum furtum, eorumque ut & conjugū stuprum, ob pretium flagitii datum, à parentibus & maritis concessum, *h*) concubitus cum matribus, *i*) & masculis, *k*) & quæ id genus alia ab Apostolo recensentur. *l*)

2. *Obscuritatem* cum Gerhardo ponimus, ob defectum 1. recti rationis usus, culturæ, atque prudentiæ, unde passim apud scriptores *rudis & inconditus sensus* eis tribuitur; *m*) 2. humaniorum, quæ feritatem morum emolliant, literarum. 3. Legum rationalium. *n*) 4. Veri Dei notitiæ cum recto cultu conjunctæ: qui tamen magis fortean gentilismi notam facit. Horum in loco resident ingenii hebetudo & stoliditas; mala educatio; hominum immolatio; *o*) leges vel nullæ, vel plerumque *p*) irrationales; Deorum multorum fictio, seu potius creaturarum, Dæmonumque apud multas sub statuis & idolis adoratio.

3. Tertio loco recenset ille *ferarum societatem*. Namque vivunt quasi cum feris montani & sylvestres, nec tantum socios homines, *Æξελς Ιηρωδελς* sequentes, habent; verum etiam spiritus impurus inter

ter eos regnat, ἐνεργῶν ἐν τοῖς υἱοῖς τῆς ἀπειθείας. q) Hæ igitur sunt illæ notæ, quibus rudem & multis modis agrestem vivendi rationem ab humaniori libuit discernere. Quanta sit enim, & quam latè patens hæc feritas barbarorum, qui ritus portentosi, quæ legum ac dominorum tyrannis, referre exactè, iusti voluminis opus esset. r) Hoc solum adjiciam, non vitia hæc à me conjunctim omnia ad barbariem constituendam accipi, nec prout in quibusdam singulariter deprehenduntur, sed quatenus apud aliquam gentem communia sunt. Verbo: barbaries est, ubicumque *licentia* s) contra præcepta divina, menti impressa, ob defectum aut intellectus, aut legum & disciplinarum, invaluit; atque sunt alii aliis barbariores, five crassiores & stupidiore.

a) Zentgr. de J. G. or. Art. 3. §. 26.

b) Postil. Salom. an VI. Cont. nach Trin.



*Trin. super dict. Cant. 8: 5. c) Florus lib. 3. c. 3. v. 5. d) Curt. lib. 4. cap. 6. &c. e) Claudianus in Ruf. l. 1. f) Curt. lib. 8. c. 4. g) Julius Cæs. de bell. Gall. lib. 7. p. m. 155. &c. h) Curt. lib. 5. c. 1. & Hybner de Georgianis. i) exempla vid. Zentgr. Art. 1. §. 15. de J. G. k) Barclai. Icon. anim. c. 9. de Turcis. l) Rom. 1. m) Curt. lib. 7, 8. l. 8, 2. l. 7. c. 4. n) Salustius Jugurt. bell. c. 18. o) Curt. lib. VI. c. 3. & Jul. Cæs. lib. 6, p. m. 107. p) Thom. Explan. in Ar. 1. Pol. 1. l. 1. q) Eph. 2, 2. r) Cost. de proc. Ind. §. 2, 3. s) Curt. lib. 8, 3.*

### §. VI.

Tales hodie esse Africanos & Asiaticos, & quotquot Muhame-  
tismi, flagitiosi ac venenosi gene-  
ris, sunt, multis probare, non ali-  
ud est, quam noctuas Athenas  
mittere. Americæ etiam minimam  
partem cultum animorum passam;  
reliquorum vero animos nudâ &  
humano generi pudendâ barbarie  
efferatos, neque legibus, neque  
industria

industriâ temperatos audimus.  
 Hinc ergo ut abeamus, orbis no-  
 stri Europæi & Christiani mores  
 inspicientibus, haud supervacua  
 disputatio erit de Moscovitarum,  
 aliorumque à Christo nomen tra-  
 hentium ruditate & ferociâ. De  
 ecclesiâ enim Græcanicâ hoc fa-  
 tendum, quod si non eam nomen,  
 tamen impietas & stoliditas procul  
 a nobis discreverit. Quod vel ex  
 Georgianis constat, de quibus ta-  
 lia profert Hybner: so 1) haben sie  
 doch schlechte tugenden/ daß die kin-  
 der gemeiniglich vom Vater zum  
 stehlen/ und von der Mutter zum  
 huren gehalten werden. Ferunt 2)  
 etiam Russos gentem esse servitu-  
 ti natam, in Castigandis furtis re-  
 missam, literarum adeo rudem, ut  
 pauci inter illos vulgatissimas pre-  
 ces calleant, quibus numen propi-  
 tiant; flaminesque unum caput ex  
 sac. Bibliis, vel expositione eccle-  
 siasticâ eorum, ægre recitare que-  
 ant.

ant, librosque Latinos & Græcos  
 numquam ferme viderint. Imo ha-  
 betur testimonium cujusdam *αὐτό-  
 πτε w*) (sed ante seculum & paulo  
 ultra) qui præter alia fatetur se in  
 mediâ illâ barbarie Russiæ orienta-  
 lioris hærentem audivisse; incolas  
 quidem confessos S. S. Trinitatem,  
 verum diebus dominicis puras so-  
 lummodo fabulas, plerumque de S.  
 Nicolao, Deo illorum tutelari, po-  
 pulo fuisse prælectas, evangelii le-  
 ctionem nunquam. Dæmonem me-  
 ridianum coli & metui; qui, cum  
 maturæ rescentur fruges, habitu  
 viduæ lugentis ruri obambulet, o-  
 perariisque uni vel pluribus, nisi  
 protinus viso spectro in terram  
 proni concidant, brachia frangat  
 & crura. Multos quoque alere ser-  
 pentes, sibi in domibus familiares.  
 Homicidam, nisi *ἐπαυτοφώγω* sit de-  
 prehensus, quinque florenis vitam  
 redimere posse: homini autem, qui  
 alterius canem ceciderit, mulctam

C

10 flo-

io florenorum irrogari. O leges  
 irrationales! irrationalia animantia  
 ratione præditis præferentes! Et-  
 jam si vero talis & tanta barbaries  
 Russis, vicinis nostris non satis fi-  
 dis, objiciuntur: tamen non susti-  
 neo tantæ & perversitatis & stoli-  
 ditatis gentem illam hoc tempore  
 insimulare, siquidem novissimi Mo-  
 scorum Principes, cultioribus arti-  
 bus aliunde ad se accersitis ac libe-  
 raliter cultis, sensim ruditatis sese  
 vinculis exsolvere, jamque vecor-  
 diæ jugulum ferire cœperunt. Ju-  
 dæos, gentem vagam, avidam,  
 servilem, superstitiosam, fœdam,  
 moribus habituque incultam, hic  
 omitto. Atque in hanc contempla-  
 tionem plura me adducere non fi-  
 nit temporis ratio; sed nec illud  
 plane præterire, Hungarorum,  
 Illyriorum, Dalmatarum, istiusque  
 tractus plurium gentium mores  
 pro dominorum solere ingenio di-  
 sponi.

t) *Quæst.*

t) *Quæst. Geogr. cap. 16. qu. 40. u)*  
*Puf. introd. ad hist. cap. 11. §. 5. Barci.*  
*Icon. an. cap. 8. w) Epist. Anon. ad D.*  
*Chytræum.*

## §. VII.

Quid mortales eo usque feritatis protruserit, investiganti mihi, non aliæ sese offerunt certiores causæ, quam quæ ex sacris historiis primò colliguntur. Unde 1. caco-dæmonis, de insigni suo honore deturbati, & tenebrosa in tartara missi, summi Numinis æque ac humani generis adversarii, odium inextingvibile, insidiæ & stratagemata innotescunt. Sicut enim ille in id ab initio incumbit, ut vera Dei notitiâ eradicatâ, divinoque cultu in se translato, transfugis denique quam plurimis à civitate Dei factis, regnum suum stabiliatur, infernalium tormentorum consortibus delectetur: ita omnis barbarici & idolatriæ fons est & origo. 2. Mentis humanæ intellectus in veri cognitione

gnitione per lapsum miserrime ob-  
 scuratus; & desiderium boni cœle-  
 stis extinctum deprehenditur; quorum in locum succedente adfe-  
 ctatâ hominis malitiâ, & ardore boni terrestris & adulterini, o-  
 mnem moverunt lapidem morta-  
 les, ut ejus potirentur, cujus ma-  
 xime flagrarent amore. Quamvis  
 enim reliquiæ quædam concreatæ  
 perfectionis, & semina boni natura-  
 lia hominibus superessent: tamen  
 præjudiciis occupati, sensibus cor-  
 rupti, rerumque sensibilibus im-  
 moderato irretiti amore, dictami-  
 na luminis recti neglexerunt; adeo  
 ut magis magisque tenebris invo-  
 luti, atque deinde negligentiores  
 in seria DEI virtutumque contem-  
 platione facti; non potuerint non  
 immane quantum errare, & ad  
 mille impietatis syrtes impingere.  
 Quo aptare possum illud Gregorii:  
*ex quo semel luxuria mentem alicujus  
 occupaverit, vix eum bona cogitare per-*  
*mittit;*

mittit : sunt enim desideria viscosa ;  
quia ex suggestionē oritur cogitatio , ex  
cogitatione affectio , ex affectione dele-  
ctatio , ex delectatione consensus , ex  
consensu operatio , ex operatione con-  
suetudo , ex consuetudine desperatio , ex  
desperatione peccati defensio , ex defen-  
sione gloriatio , ex gloriatione damna-  
tio. x) 3. Historia perversi Caini  
& Chami etiam testimonii loco est,  
quanti errores nequissima flagitia  
consequantur , cum non solum ipsi  
à DEO omnis bonitatis & lucis fon-  
te averſi , & in malo obdurati , sed  
& posterī , eorum vestigiis inceden-  
tes , ad omnis generis nequitiam &  
inscitiam componerentur. Quo sta-  
bilitum huc Barclai effatum addu-  
cimus : *Unius sæpe error ceteris lu-  
bricum fuit , quo laberentur , vicissim-  
que de unius rectâ sententiâ mutuam  
sapientiam multi sumebant.* y) 4. Egre-  
gia denique scripturæ loca huc fa-  
ciunt , non quidem prætereunda ,  
sed in nostro foro non explicanda ;  
quibus

quibus justissimus Deus pariter ac clementissimus dicitur, ὅτι παρέδωκεν αὐτοὺς εἰς πάθη ἀτιμίας, 2) εἶασε πάντα τὰ ἔθνη πορεύεσθαι ταῖς ὁδοῖς αὐτῶν. α) 5. Ultimo, quem neglectus Theologiæ naturalis monstrosum fœtum enixus est, multum astutiâ imperantium crevisse constat. Quippe qui probe gnari, animos civium imperio difficiles nulla re alia efficacius, quam divinæ alicujus auctoritatis terrore incusso, regi & in obsequio teneri, sub specie zeli cujusdam religionis veræ, varias idolomanias, superstitiones & falsos ritus introduxerunt. Et quoniam homines sensibus corruptos, nec divinam ubique præsentiam percipientes noverant: Deos plures atque corporeos, quo melius rebus curandis sufficere crederentur, finxerunt, cœlestesque honores à vero Deo in res naturales, quarum opibus aperte juvabantur, b) transferendo, figmentis maxime nefandis



dis religionem adulterarunt. De Diis autem innumeris & diversis Paganismi generibus legantur ii, qui ex professo ea collegerunt. c) quanquam secundum Hesiodum d).

Τῶν ὀνομ' ἀργαλέον πάντων βροτὸν  
ἄνδρα ἐνίππειν.

x) vid. Lang. Floril. de Luxuria  
y) Icon. an. c. 2. z) Rom. i. a) Act. 14,  
16. b) Jul. Caesar. lib. 6. de Bell. Gall.  
c) Rossæus von der ganzen welt  
Religion. d) de Geneal. Deorum v. 369.  
§. VIII.

Hic quantuscumque omnium error sit, adeo tamen suus unicuique tactus est adfuetudine familiaris, ut nulli quidquam rectum putent, nisi quod ipsorum moribus conveniat. e) & sua Religio cuique optima, ut quæ plerumque non ratione sed affectu dijudicetur. f) Quem ita describit Plutarchus in Them. ὦ ξέγε, νόμος διαφέρεισιν ἀνθρώπων, ἅλλα δὲ ἄλλοις καλὰ· καλὸν δὲ πᾶσι τὰ οἰκεία σῶζειν ἢ κοσμεῖν. g) Sic Carthaginensibus

sibus erat rectum & laudabile, Saturno hostias humanas immolare; Græcis & Romanis secus. Lacedæmoniis pueris furari, modo laterent, nec deprehenderentur in furto manifesto, honestum; ceteris Græcis & Romanis turpissimum. *b)* Hinc ergo accidit, ut una quæque ferme gens alios omnes peregrinos præ se barbaros, quasi ab humanitate & virtute alienos reputaverit. Quemadmodum ut olim Græci, ita dein Romani, omnes extra limites regni sui, ( Græcis exceptis ) appellarunt barbaros: à quibus tamen ipsi vicissim audierunt tales. Ægyptii item omnes, qui alia, quam ipsi, utebantur lingua, barbaros vocarunt. *i)* Paulus Jovius & alii quidam Itali omnes alios præ se populos pro barbaris habitos varia ambitione contemserunt. Machiavellus Florent. Germanos barbaros vocavit, Italos vero, Gallos, & Hispanos multo sceleratiores. *k)*

Recte

Recte igitur Anacharsis objicienti,  
 Scythas esse barbaros, respondit: **┐**  
 Scythas quidem in Græciâ pro bar-  
 baris haberi, at vicissim apud Scy-  
 thas Græcos barbaros esse **l)**. Hæc  
 falsa uniuscujusque opinio maxi-  
 mum recipiendæ veræ religioni im-  
 pedimentum est. Ut enim sua sibi  
 honesta, peregrina verò turpia;  
 ita fastu partim & aliorum popu-  
 lorum inhumano contemptu, ab  
 aliarum gentium familiari commer-  
 cio adeò abstinent, ut amice licet  
 provocati, difficilem sui aliis faci-  
 ant copiam. quod de Indis testa-  
 tur Kircherus, fuisse videlicet ta-  
 les, usque dum clariora Christiano-  
 rum ingenia sensim experti sunt. **m)**  
 Et partim rectores civitatum, ne  
 cives sui ex alienis aliquid vitiosi  
 contagii contrahant, ab eorum con-  
 fociatione & familiaritate illos re-  
 vocant: quidam ut Lycurgus Spar-  
 tanorum legislator, non relinquunt  
 illis liberum peregrinari & vagari,  
 quippe

quippe ξενικὰ ἤθη συνάγεσι μιμήματα  
βίων ἀπαιδευτῶν, καὶ πολιτευμάτων δια-  
φορὰν. n) Quidam advenas nullā  
de causa utili in urbem irrepentes  
abigunt, μὴ διδάσκαλοι κακῶς τινὸς ὑπ-  
άρξωσιν. o)

e) Corn. præf. f) Grot. lib. 2. c. 20.  
41. g) Lambini not. in præf. Corn. N.  
b) ibidem. i) Theat. prud. eleg. J. Frid.  
Reinhardi ex just. Lipsii libris pol. ere-  
ctum L. V. c. IV. §. 17. k) Enenkel in  
Thucid. l. 1. de bell. Pelop. N. 3. ad vo-  
ces : nec Barbarorum. l) ibid. conf.  
Laërt. lib. 1. c. 9. m) Sina illustrata p.  
116. 118. n) Plutarch. t. 1. opp. Lyc. f.  
56. α. o) ibid.

### §. IX.

Licet verò lumen mortaliū,  
sibi relictum, jam non sufficiat vo-  
luntati Dei declarandæ, aut cultui  
ejus legitimo prodendo; nam sicut  
opificis potentiam & peritiam osten-  
dunt opera ejus, imaginem autem mi-  
nime; sic opera Dei &c. p) : tamen  
homo, si modo uti vellet istius be-  
neficio,

neficio, h. e. scintillulis in mente  
 relictis; admoto quasi folle sufflan-  
 dis & excitandis, nec non ratioci-  
 niis de origine hominum, creatio-  
 ne & conservatione mundi; posset  
 non tantum cognoscere unum De-  
 um esse, omnium creatorem, gu-  
 bernatorem, eundemque ut supe-  
 riorem, ex quo omnia depende-  
 ant, esse honorandum, amandum,  
 colendum; omnia in ejus laudem  
 facienda, atque id genus alia hone-  
 sta, justa & decora: verum etiam  
 ad illam notitiam, licet confusam, &  
 post hanc vitam obtinendo fini in-  
 sufficientem, pertingeret, quæ est  
 de præmiis vel pœnis animæ post  
 mortem, prout scil. in corpore se-  
 gesserit; imo cognosceret se non  
 pravitati obnoxium, sed in majori,  
 quam quidem nunc sit, perfectio-  
 nis gradu primo creatum fuisse,  
 sua vero ipsius culpa (licet modum  
 nesciat) morbum lethalem, ut in  
 Deum sit rebellis, contraxisse; ideo-  
 que

que ex obligatione quadam & pro salute sua esse studendum, quibus modis ad ejusdem cognitionem redeat. Adeoque etsi divinam revelationem initio ignoraret, tamen quæsitæ istius, vel sibi annunciataῖ *κρίτηρια*, tam interna, quam externa volvendo & revolvendo, non posset non adspiranti numini jamque adjuvanti etiam reduniri. Verum, si crudum ulcus adaperiam, quam fors mortalium misera & deploranda est! Amorem, cultum, & obsequium creatori debitum transferunt ad res creatas, pro Summo Bono nihil præter fluxa & fragilia, quæ in sensus incurrunt, meditantur, & eligunt; nihil minus, quam Deo dignas cogitationes & opiniones foveant :

Et quibus *os sublime dedit, cælumque*  
*tueri.*

*Fussit & erectos ad sidera tollere vultus; q)*

*Hi proni, ut spectant animalia cetera*  
*terram.*

Verum

Verum enim vero, notiones interea ad quamcumque religionem constituendam communes, r) Deum esse, omnisque juris violati vindicem, ut rerum aliarum moderatorem, non oblitteratæ, sed apud omnes gentes, quantumvis maxime feras, robustæ & permanentes sunt. Hinc igitur in omni terrarum orbis angulo firmum fidei omnis & jurisjurandi fundamentum viget; omnium legum principium & fulcrum. Si qui enim dementia hominum portenta sint, existentiam numinis negantia, de quibus superiori semestri ad hoc Athenæum disputatum est, s) latent tamen illa adhuc, imo latebunt, sub ferali suo antro privato, monstra rationalium, & in sensum certè reprobum à Deo data; nec in tantum invalescunt, quin verum sit Æliani de barbarorum religione caput, cujus hæc summa est, : *μηδεις αὐτῶν εἰς ἀθεότητα ἐξέπεσε, μήδε ἀμφιβάλλουσι*  
*περὶ*

περὶ θεῶν , ἀρὰ γέ ἐσιν , ἢ ἔκ ἐσιν ! καὶ  
 ἀρὰ γε ἡμῶν . Θεοντίζουσιν , ἢ οὐ . t).  
 Hisce igitur ita constitutis & inve-  
 stigatis , haud difficile erit , lites ,  
 propter mores & religionem inter  
 gentes exortas , dirimere , seu com-  
 ponere.

p) *Baco de Verulam. Augm. Scient.*  
*lib. 3. c. 2. q) vid. Metam. 1. 2. r) Grot.*  
*de J. B. & P. lib. 2. c. 20. §. 46. s) A-*  
*θεομάσιξ. Morini. t) lib. 2. c. 31.*  
*var. hist.*

## CAP. III.

### De causis belli adversus Barbaros.

§. I. *Agitur de causis justificis & suasoriis.*

§. II. *Proponitur quaestio : an ob servile  
ingenium justè subigantur barbari?*

§. III. *Et*

§. IV. *Ad illam negative respondetur.*

§. V. *Quæritur : an ob delicta injus natu-  
ra à moratioribus rectè puniantur?*

§. VI. *Idem negatur.*

§. VII. *Gentium circa hæc officium huma-  
nitatis describitur.*

§. VIII.



§. VIII. De superstitione & irreligiositate  
quaritur.

§. IX. Non ob priorem debellandos asseritur.

§. X. Afferuntur argumenta pro irreligiositate.

§. XI. Refutantur.

§. XII. Instituitur quaestio: an propter fidem Christianis jus competat in infideles?

§. XIII. Infideles justos dominos suarum rerum esse, ostenditur.

§. XIV. An propter religionem veram propagandam bello impetantur gentiles?

§. XV. Religionem bello propagari non debere, affirmatur.

§. XVI. Quaestiones ceterae recensentur.

§. XVII. Quid de haeticis tenendum, breviter monstratur.

§. XVIII. Quanam sit justa causa belli adversus barbaros, subjungitur.

§. I.

**O**Rdine sic perductus ad causas belli in barbaros hoc levi penicillo adumbrandas, in memoriam vocor discriminis Polybiani haud incommodi, & à Grotio, summo Vi-  
ro, in de causis belli injustis adhi-  
biti

biti, quo aliæ dicuntur *justificæ*, aliæ *suasoriæ*; προφάσεις ab αἰτίαις distinguuntur. u) Sicuti enim de justitia, & lege hominibus a Deo posita contra violentiam, cecinit Hesiodus, *Vir perelegantis ingenii & mollissima dulcedine carminum memorabilis.* x)

Ἰχθύσι μὲν καὶ θηροῖς καὶ οἰωνοῖς πετεει-  
νοῖς

Ἔσθειν ἀλλήλους, ἐπεὶ ὁ δίκη ἐστὶν ἐπ'  
αὐτοῖς.

Ἀνθρώποισι δ' ἔδωκε δίκην, ἥ πολλὸν  
αἰρίσῃ

Γίνεται. γ)

Quod non tantum omnium menti-  
bus infixum, verum etiam consen-  
su usque eo ubique probatum est,  
ut nemo in id sine famæ vel *existi-*  
*mationis* suæ h. e. *summæ voluptatis* z]  
ac vitâ ferme carioris detrimento  
delinquere queat. Ita, quibus  
quoque voluptati sævitia, quibus  
finitimas, sibi nullo modo molestas,  
bello conterendi ratio sola imperiî  
cupiditas est, non solum bella, quæ  
justitiâ

justitiâ vacant, ineunt, verum etiam  
 injuste inita juris peplo defendere  
 callidissime latagunt, Quod profe-  
 cto non male aliquis in bellis etiam  
 sacris animadverterit; quippe quæ  
 cum vario juris titulo & prætextu  
 auctores suscepisse leguntur: sunt  
 tamen pleraque, uti de talibus lo-  
 quitur Vellejus, *bella non causis ini-  
 ta, sed prout eorum merces fuit. a)*  
*Nam nunc vix bellum est ullum, quod*  
*non religionis causa dicatur geri b)* Su-  
 um quisque bellum sacrum prædicat,  
 hostes quisque suos impios dictitat, suam  
 quisque causam sanctam nominat; in o-  
 re omnium sanctum piuinque versatur:  
*consilio, conatu, animo secus agitur. c)*  
 Ego vero τὴν δίκην bellantium in  
 medio relinquens, eas solummo-  
 do causas, quæ non tantum ex do-  
 minio, quod sibi quidam falso vin-  
 dicaverunt, sed ex tribus causarū bel-  
 landi generibus, *defensione, recupe-  
 ratione & punitione d)* vel juris spe-  
 ciem habere videntur, vel quibus-  
 dam

D

dam

dam ita visæ sunt , expendere aggredior.

*u) Grot. de J. B. & P. lib. 2. c. 1. §. 1. & cap. 22. §. 1. inspicie notas etiam auctoris. x) vid. elogium hoc apud Vell. Pat. lib. 1. c. 7. y) Hesiod. opera & dies v. 275. & c. z) Puf. de J. N. & Gent. lib. 3. c. 2. §. 7. a) L. 2. c. 3, 3. b) Dom. Sotus de Just. & Jure lib. 5. Quæst. 3. de dominio art. 5. c) Theat. prud. eleg. Job. Frid. Reimb. in Lipsj. lib. V. c. IV. §. 18. d) Grot. lib. 2. c. 1. §. 2. de J. B. & Pacis.*

## §. II.

Inter has mihi primò ea Philosophorum controversia decidenda occurrit , qua disputari solet , æquumne an iniquum sit , barbaros armis subigere , quasi naturaliter servos , & dignos qui serviant? idque vel quia antiquissima est , vel quia prima juris naturalis , inter homines gentesque intercedentis , præcepta directè tangit. Scilicet id primum ob prius ostensam  
æqua-

æqualitatem resultat præceptum :  
*ut ne quis , cui peculiare jus non est  
 quæsitum , plus sibi quam reliquis arro-  
 get , sed alios æquo secum jure frui per-  
 mittat. e)* Eorum autem sententia ,

qui hoc bellum ut justum defen-  
 dunt , his argumentis suffulta est.

1. Quod æquum sit , ut discrimen in-  
 genii differentia juris consequatur ,  
 ac hebetiores & ad se regendos in-  
 epti prudentioris alicujus imperio  
 subjecti vivant ; adeoque barbaros  
 ob intellectus imperfectionem justo  
 dominio haud aliter ac dementes  
 & infantes carere ; & ipso opere à  
 naturâ morationibus imperium da-  
 tum esse , atque sic consequenter  
 jus illos invitos etiam ad servien-  
 dum adigendi competere. 2. Quod  
 naturæ congruens sit , & utriusque  
 partis salutis atque commodi melius  
 consulatur , si in perspicaciores re-  
 gimine collato , ceteris obsequio in-  
 juncto , illi & sibimet ipsis & his re-  
 gendis prospiciant , hi vero corpo-

ris vigore ac robore utilia jussa ex-  
sequantur. *f*)

*e*) *Puf. lib. 3. c. 2. §. 4.* *f*) *Arist. Pol. lib. 1. c. 1.*

### §. III.

Ad primum quod attinet, re-  
futavit id tanquam absurdissimum  
illustris Vir Pufendorfius, *g*) osten-  
dendo servitutem hanc adversâ  
fronte cum naturali æqualitate pu-  
gnare, nec aliquem Regem ac du-  
cem statim esse, qui imperio sit di-  
gnus, & exercitui regendo aptus;  
sed naturam in eo velut sollertiam  
ostentasse suam, quod mortalibus  
non eadem mensurâ bona sua ad-  
mensa sit, ne alter alterius ope non  
indigendo minus exerceret socia-  
litatem; atque ut inter istam varie-  
tatem justa sibi harmonia constaret,  
æqualitatem istam naturalem, effe-  
cisse. Siquidem enim sapientissimus  
creator idemque summus rector  
nobis eandem animam instillavit  
ex eadem stirpe & materiâ nos pro-  
duxit

duxit, ut eodem modo nascamur, nutriamur, adolescamus, decedamus, nec non fortunæ ludibrio æque omnes obnoxii simus; utique ad colendam socialem vitam omnes æqualiter strinxisse; eandemque omnibus libertatem decrevisse præsumitur. Ad eundem certè modum ac in republicâ princeps terrenus nobiliori vel ditiori civi nihil licentiæ & juris in ceteros statuit, quin eadem iste, quæ ipse exspectat officia, erga alios exerceat; & rusticorum astutiori vel laboriosiori nihil quidquam in reliquos propter deteriores conditionem & fortunam tenuiorem, quin communi jure illi etiam ex æquo gaudeant, conceditur: Sic etiam homines æquali jure sub divino imperio gaudentes, & quæ, ut tantò melius illud factum tectumque servaretur, introductæ sunt civitates, haut quaquam eo valent, ut illorum alte alterum, harumve una alteram,

D 3

stolidiorem

stolidiorem licet, isto rerum domi-  
 nio & proprietatibus possit privare,  
 quæ semel unicuique per divisio-  
 nem vel occupationem, jam con-  
 sensu diu firmatæ, contigerunt.  
 Verum hæc potestas solius DEI est,  
 regis regum & domini dominantium;  
 quam in ullum hominem  
 transtulisse aut unquam jus & im-  
 perium in omnes & omnia conces-  
 sisse nec legitur, nec intelligitur. Si  
 illa enim differentia juris ex natu-  
 râ esset, aut à præscripto divino  
 dependeret, utique esset aliquo mo-  
 do manifestata, vel prona conse-  
 quentia ex principiis innatis erue-  
 retur, ut plerorumque saltem con-  
 sensum adipisceretur. Jam vero ni-  
 hil tam naturæ hominum adversa-  
 tur, nec quidquam eruditi tantum  
 non omnes tam acriter impugnant,  
 quam servitutem istam naturalem.  
*Nemo est tam stupido ingenio, quin ar-  
 bitretur rectius aut commodius suo se in-  
 genio vivere, quam si ad alterius arbi-*  
 trium



*trium se componat. i) Quibus ultimo verba Francisci Victorix adjiciuntur: Barbari secundum rei veritatem non sunt amentes, sed habent pro suo modo usum rationis, quia habent ordinem aliquem in suis rebus, matrimonia distincta, magistratus, dominos, leges, opificia, religionis speciem &c. quæ omnia requirunt usum rationis. Imo si usum rationis non haberent, ad querendum necessaria ad salutem, essent sine culpa in peccato. k)*

*b) Puf. de J. N. & G. lib. 3. c. 2. §. 8.*

*i) ibid. k) relect. V. sect. 1. §. 23.*

#### §. IV.

Ad alterum illud sufficiens esse potest responsio pronunciatum egregium Grotii: *Non enim, si quid alicui est utile, id statim mihi licet ei per vim imponere. l)* Fateor quidem naturam quorundam ita comparatam esse, uti Plutarchus refert Agefilaum dixisse: *Τὸς τὴν Ἀσίαν κατοικοῦντας, ἑλευθέρας μὲν κακὰς εἶναι, δούλους δὲ ἀγαθὰς; m)* et *Barclajus de Moscis:*

*Moscis: Servituti gens nata, ad omne libertatis vestigium ferox est, placida si prematur. n)* Est autem illa servitus talis, quam gentes suo sub rege serviant. Et ut nullam usque eò barbaram gentem inveniri crediderim, o) quin aliquis ex illa tantis animi dotibus gaudeat, ut ceteris imperare queat; ita nullam tam abjectis esse animis, quæ non ad ultimum usque antiquum patrium servare statum & domestico regi imperio, quam aliis subjecta esse mallet. *Ergo si vel maxime singuli gentis alicujus servitutem ament personalem, naturali tamen libertate omnes, quæ integrum generis humani cætum & populum constituunt, exuere propterea non licet, cum eandem sub suo rege, qui sui juris est, servire queant servitutem. p)* Commoda vero, quæ exinde provenirent, quod moratior gens sibi barbariorem subjiceret, plurimis suis scaterent incommoditatibus. Nam etsi semper verum est, hoc tritum proverbium: **Omni**

*Omnis commoditas sua fert incommoda  
secum*

*Nulla incommoditas commoditate caret:*  
Illa tamen salus, qui tali bello hebetioribus, & officium vel utilitas, quæ prudentioribus acquireretur, tanta fortè constaret sanguinis ex utraque parte, tantâque bonorum profusione, ut minimâ quidem ex parte damna ista exæquaret bonum quæsitum; & postea, ut navis ad eam magnitudinem pervenire potest, quæ regi nequeat, sic & tantus hominum numerus &, locorum distantia unum regimen non ferrent; ideoque ex emolumento ad hoc jus imperii nulla valet consequentia. Ex aptitudine autem naturali hoc restat ut concludamus, quod si imperium sit constitutum, magis naturæ congruere, ut in eos, qui ingenii felicitate polleant, summi vis imperii conferatur; his vero, qui obtusiores sunt, obsequii gloria relinquatur: atque  
tum

tum quoque propter usum rationis, qui tardioribus penitus denegari nequit, liberam esse debere electionem, & , quamdiu nullum uni in alterum jus est quæsitum, spontaneum in subjectionem consensum.

*l) de Jur. B. & P. lib. 2. c. 22. §. 12. m) tom. 2. opp. Apoph. f. 190. vide Zentg. de J. Gent. Art. 3. §. 7. n) Icon anim. c. 8. o) vid. exemp. apud Zentgrav. cit. loco. p) ibid.*

### §. V.

Hanc alia quædam, de barbarorum delictis in jus naturæ, acrior insequitur Politicorum disputatio; quâ inter illos minus convenit de puniendi potestate, quam, ceu effectum legis naturalis, alii regibus competere affirmant, alii negant. Inter illos sunt præter alios etiam Hugo Grotius, Vir omnium calculo πολιτικώτατος, & illustris Baco de Verulamio: Inter hos celeb. Pufendorfius, Zentgravius, Franciscus a victoria, Josephus à Costa, Covar-

Covarruvias, Vasquius & alii. Affirmantium argumenta optime cognosci possunt ex eodem illo Grotio, ubi ita scribit : *q*) Sciendum quoque est ; reges, & qui par regibus jus obtinent, jus habere pœnas poscendi, non tantum ob injurias in se aut subditos suos commissas, sed & ob eas, quæ ipsos peculiariter non tangunt, sed in quibusvis personis jus naturæ & Gentium immaniter violantibus. Nam libertas humanæ societati per pœnas consulendi, quæ initio, ut diximus, penes singulos fuerat, civitatibus ac judiciis institutis, penes summas potestates resedit ; non proprie qua aliis imperant, sed qua nemini parent. Imo tanto honestius est alienas injurias quam suas vindicare, quanto in suis magis metuendum est, ne quis doloris sui sensu aut modum excedat, aut certè animum inficiat. Hanc sententiam confirmat Herculis & The-  
 sei

sei elogiis , passim apud scriptores collectis; quod *ille* alienas terras transierit non concupiscendo , sed vindicando & injustos puniendo ; eo-que pacto maximorum bonorum auctor hominibus factus , inque se susceptâ communi humani generis curâ inter Deos referri meruerit : *hic* vero latrones & quidquid monstri ac sceleris ubique fuit , virtute animi & robore dextræ sustulerit vel comminuerit. Adeoque cum Isocrate concludit : Justissimum esse bellum in beluas , proximum in homines beluis similes. Et addit , quod , si talis puniendi potestas non ex jure naturæ regibus concessa esset , sed tantum ex jurisdictione civili in suos , tum non hostis in hostem puniendi jus haberet , etiam post bellum susceptum ex causa non punitiva ; quod tamen jus plerique concedant , & usus omnium gentium confirmet.

q) *De Jur. Belli & Pac. lib. 2. c. 20.*  
 §. 40. §. VI

## §. VI.

Hæc quantacunque sunt, ex altera tamen parte eò liberius pugnare sustineo, quò uberius modo laudati viri hæc dudum tela exceperunt, atque hebetarunt. Positum enim est, delicta illa, propter quæ in arenam ceteri descendere non resant, nullo modo nos, sed eos tantum, qui extra nostram civilem societatem degant, tangere. Qualia sunt sacrificia hominum, esus carnum humanarum, impietas in parentes, & id genus aliæ vel in suos vel vicinos injuriæ. Tales enim peccatores non in alios, quam quos directè lædunt, injurii, nec in universum genus hominum hostiles dici possunt. Primo igitur regerendum, naturam quidem sese defendendi potestatem, & injuriarum illatarum vindictam sumendi, jus vero damna in quosvis illata ulciscendi non magis concessisse, quam eminentiam homines inter introduxisse.

duxisse. Pœnam enim imponere , non est alicujus æqualis , sed superioris. Et quamvis vir sæpè laudatus contendit libertatem istam penes summas potestates resedisse , *non propriè qua aliis imperant , sed qua nemini parent* : tamen hæc adeo hoc loco conjuncta observantur , ut separatim vix intelligi queant. Nec aliter illud *aliis imperare & nemini parere* concipi potest , quam cum jure primò & per se puniendi suos , & ab aliis reparationem dati damni , atque cautionem de non lædendo in posterum per modum belli exigere. Nam alias , cum in omni provincia multi sint peccatores , & graviora hæc sint peccata Christianis , qui plenius ea de re edocti sunt quam reliquis : quotidie regna mutari possent. *quam ob rem ubi in alium , cujus defensio mihi non est commissæ , peccatum fuit , non magis illius ultionem extra causam fœderis mihi arrogare possum , quam jus dicere iis , qui*  
*mihi*



*mibi non sunt subiecti r)* Deinde nec obstat, si quis secundum illud Democriti : *Φύσει τὸ ἀρχεῖν ὀικητῶν τῶν κρείσσοι*, ex grotio objiceret, maleficum se quovis alio inferiorem fecisse, & quasi ex hominum cœtu detrussisse in bestiarum censum, quæ homini subjacent. Nam in eligendo est quidem hoc convenientius, quod Democritus innuit; ast alias meliori sufficit ea, quæ oportuit, fecisse, & laudem ac præmia meruisse; ac peiori, justissimum DEUM habere ultorem; cui soli legislatori ut inobediens fuit, ita eidem soli det pœnas, æquo similis censetur. Qui summus rector sicuti hunc non regem alterius constituit, (quod non ab hoc dictatis legibus dirigitur alter) ita nec judicem vel pœnæ exactorem. Nec probabilior mihi habetur hæc conclusio: hic delinquit, e. moratiori subjicitur veluti brutum; quam illa: hic delinquit, ergo non habet animam vel naturam

naturam humanam. Ut enim delicta illa non pervertunt istius substantiam, ita nec ejus dignationem, ut inter bruta sit referendus. Barbari itaque hujusmodi bello impetiti haud ineptius Ægyptio illa ob-  
 jicere possunt: *quis te constituit principem & judicem super nos.* s) Postremo quoque, videndum an ipse animus, domum, remp. ex virtute regat, alioqui barbaris nequior. Erudiendi enim hi potius & monendi sunt, quam debellandi. Cur enim tibi serviant, cur jus vitæ & necis in eos habeas, quia callidior es? t) Hoc idem tenendum est de iis, qui neque magistratus neque leges habent, vel incertis sedibus & legibus vagantur, modo injurii non sint. Concludo igitur: quæ barbari peccant, non cujusvis est animadvertere; &, si ligna silvestria, uti est in biblicâ illâ parabolâ, u) rhamnum sibi, prætermittâ olivâ, ficu & vite, Regem creant: non

non mirum est, si illius incendio concrementur. x)

r) *lib. 8. c. 3. 7. Puf. de J. N. & G.*  
 s) *Exod. 2. v. 14. t) Adam. Contz. 10.*  
 8. 4. u) *Jud. 9. x) Costa 2. 5. de pro-*  
*curand. Ind. Sal.*

## §. VII.

Quemadmodum igitur natura  
 cœtuum socialis non rectorium sed  
 æquatoriũ jus introduxit, ne mora-  
 tiores ob barbariem, sibi innoxiam,  
 ceteros bello impetant; ita ob co-  
 gnationis affectum unusquisque ea,  
 quæ gloriæ DEI & utilitati aliorum  
 contrariantur, corrigendo & admo-  
 nendo avertere studebit, atque in-  
 tercedere debet eo modo, quo tale  
 humanitatis officium describit Iso-  
 crates: δίκαιον τὲς ἐπ' εὐνοίᾳ νῦν θετῶν-  
 τας μὴ μόνον κατηγορεῖν τῶν πεπγαγ-  
 μένων, ἀλλὰ καὶ συμβεβλέπειν, ποίων ἀ-  
 πεχόμενοι, καὶ τίνων ὀρεγόμενοι, παυσάι-  
 μεθ' αὖν ταύτην ἔχοντες τὴν γνώμην,  
 καὶ τοιαῦτα ἐξαμαρτάνοντες, γ) Idque  
 eodem jure, quo olim ecclesiæ par-  
 E ticulari

ticulari ejusque doctōri licuit alienæ  
 diœceseos ecclesiam ejusque doctō-  
 res, cum ob doctrinæ errores, tum  
 ob morum vitia corripere. Si quo-  
 que gens aliqua in auxilium â læsis  
 vocata iis succurrat, eosdem in tu-  
 telam suscipiat, & hostes eorum  
 auxilia . submitiendo persequatur ,  
 prosternat, & damna ulciscatur, ob  
 pietatis & dilectionis affectum, ho-  
 mini, nudo, alias & fragili, datum,  
 atque exinde promanans alios tu-  
 endi & fovendi studium : Id omni-  
 no justum existimo. Quod præter  
 alios Cicero eleganter innuit : *Se-  
 cundum naturam est, pro omnibus gen-  
 tibus, si fieri possit, conservandis aut  
 juvandis maximos labores molestiasque  
 suscipere. & præterea communem totius  
 generis hominum conciliationem & con-  
 sociationem colere, tueri, servare de-  
 bemus.* 2) Id denique etiam addam,  
 quod, si genti moratiori cum im-  
 maniori bellare contigerit, illa vi-  
 ctrix jure quodam belli merito hanc  
 victam

viſtam ad turpes mores exuendos  
& dediscendos cogere poſſit; ſecun-  
dum illud; *Jus eſſe belli, ut, qui vi-*  
*ciſſent, iis, quos viciſſent, quemadmo-*  
*dum vellent, imperarent. a)* & Alex-  
andri apud Curtium: *Leges a victo-*  
*ribus dici, accipi a victis. b)* Qui idem  
ob id paſſim laudatur, quod Sogdi-  
anos maſtationem parentum, eo-  
rumque carnium eſum dedocuerit.  
Ut & Gelo, qui Carthaginenſes  
coëgerit inter conditiones pacis  
hanc quoque adſcribere, ipſos in  
poſterum Saturno liberos nunquam  
immolatuſos eſſe. c)

y) *Orat. de pac.* z) *Off. lib. 1. c. 41.*  
a) *Jul. Cæſ. de bell. Gall. lib. 1. c. 36.*  
b) *lib. 4. c. 5.* c) *vid. Zentgr. pag. 156.*  
*de orig. J. G. Grot. 2. 20. §. 47.*

### §. VIII

Hinc ut ad religionem perdu-  
camur, inſpiciendum nobis eſt, an-  
non bello ideo ſint adoriendi bar-  
bari, quod conſociationis humanæ  
vinculum vel ſuperſtitione vel irre-

ligiositate solvere videantur. De religione enim id fateri necessum habemus, quod, per se licet ad conciliandam Dei gratiam valeat, habeat tamen & suos in societate humana effectus maximos. *d)* quum cultus Deo debitus, fides, spes & charitas non tam adoratione religiosa, quam caritate erga alios homines, qua morem voluntati ejus gerimus, probetur & demonstretur. Quinimo credere Deum esse, eumque venerari, eam ob causam maximum omnis societatis vinculum, legum fundamentum & fulcrum est; quia stimulante hominum malitia & propria utilitate, proclivis & facilis est a dictaminibus rationis discessus, nisi supponatur ille eorum conditor, vindexque transgressionum, probitatis vero remunerator æquissimus. Hinc factum videmus, ut in omni republicâ prima fuerit religionis consultatio, prima magistratus cura, & sub-

sublatâ illâ , fidem & societatem tolli, nihilque nisi inane nomen justitiæ relinqui , perturbationem vitæ sequi & magnam confusionem, cum Cicerone *e*) omnes consenserint. Jam vero, ut rursus H: Grotius confitetur, *majorem habet usum religio in majori illa , quam civili societate ; quia in civili partem ejus suppleant leges civiles & facilis legum exsecutio: cum contra in magna illa communitate juris exsecutio sit difficillima , ut quæ nisi armis expleri nequeat, & leges paucissimæ : quæ ipsæ insper sanctimoniam suam habent præcipuè a metu numinis. Unde qui in jus gentium peccant , jus divinum violare passim dicuntur. f)* Unde concluditur, quod, siue contaminata, siue nulla est religio, tamen in diversa gentes abripit studia, & atrocissima gignit bella ; atq; sic societati diversitatem religionis repugnare, & ad omnium pertinere injuriam dicunt.

*d) Grot. cit. sep. lib. & cap. §. 44.*

E 3.

*e) De*

e) *De natura Deorum lib. I. cap. 2. & c.*

f) *cit. loc.*

### §. IX.

Huic itaque quæstioni ut satisfaciam, primo quæ superstitionem attingunt, explicanda sunt. ubi ad id, quod antea dictum est, respiciendum; scilicet unicuique suum de Deo sensum, quantumvis erroneum, rectum & optimum videri, & ob istam persuasionem nihilominus fidei, pactorum ac jurisjurandi satis validum esse fundamentum; id enim exinde etiam probatur, quod ipse Deus pejerata numina falsa non minus quam se ipsum vindicat. Quod cū ita sit, etsi multa mala hominibus impiæ ac diversæ religiones afferūt, bella etiam non raro & dissensiones; illam tamen diversitatem non justam causam belli puto. Nam si ob eam nihilominus humanæ societatis vincula facta tecta maneant, non rei judicari possunt communis juris læsi, qui superstitioni variæ addicti



addicti sunt, sed læsæ majestatis divinæ; nec in illud, sed in hanc, quidquid injuriæ est, tendit. Sive igitur genios, sive defunctorum, qui beneficiis in humanum genus excelluerunt, animas, sive astrorum aliarumve rerum naturalium virtutes, quorum opibus aperte juvantur *g*) colunt, cum revelatione divina careant, nec summi Dei cultum deferant, sed illum cultum, qui a majoribus traditus est, rectissimum ducant: excusabiles certe sunt coram hominibus, & à Deo solo, cujus hîc κρίματα prorsus ἀνεξετένητα, καὶ ὁδοὶ ἀνεξιχνίαστοι, puniendi. Hisce autem usum & effectum religionis non inficias eo, quin major gentes inter exstaret amicitia, si idem de Deo Rectore nostro summo sentirent omnes; ideoque maxime optandum: "Ἰνα Θεὸς τῆς ὑπομονῆς καὶ τῆς παρακλήσεως δώῃ ἡμῖν τὸ αὐτὸ Φρονεῖν ἐν ἀλλήλοις κατὰ Χριστὸν Ἰησοῦν. Ἰνα ὁμοθυμαδὸν ἐν ἐνὶ σὶματι δοξάζωμεν

μεν τὸν θεὸν καὶ πατέρα τῷ κυρίῳ ἡμῶν  
 Ἰησοῦ Χριστῷ. b) Sed id solum innuere  
 volui, quod possint gentes diversæ  
 confessionis æque ac ejusdem unā  
 sociales agere, si modo pacem & fi-  
 dem non avaritia vel ambitio fa-  
 stusve quorundam disruperit, &  
 hanc bello causam prætenderit. Cu-  
 jus rei fons ex insita malitia contu-  
 maciaque promanat, dum tanto plus  
 honoris putant suis quisque ritibus  
 accedere, quo magis alienos pro-  
 culcârint. Idcirco, non quod im-  
 pietas idololatriæ summâ pœnâ non  
 digna sit; sed, ut alii per se nec ob-  
 est nec prodest alterius religio, ita  
*religionis jus hominibus cum hominibus  
 proprie non est, sed inter Deum & ho-  
 minem; nec bellum inferendum est cau-  
 sa religionis. i)*

g) *Ful. Cæs. de Bello Gall. lib. 6. de  
 Diis Germanorum. b) Rom. 15. 5. & 6.  
 i) Frid. Reinhard. Theatr. prudent.  
 eleg. lib. 5. c. 4. §. 17.*

## §. X.

Qui vero in multis optime mihi consentiens fuit Grotius, eam, quæ jam insequitur, difficiliorem enodatu fecit controversiam: cum statuit eos iustius puniri, *qui in eos, quos Deos putant, irreverentes atque irregiosi sunt.* Quidquid enim illis, id tanquam Deo faciant.*k)* Quales aliquando Phocenses fuisse constat: *qui cum agris, liberis, conjugibus privarentur, desperatis rebus, Philomelo quodam Duce, velut Deo irascentes templum ipsum Apollinis Delphis occupare; inde auro & pecunia divites, conducto mercenario milite, bellum Trojanis intulerunt.* *l)* Ad hujus positionis affirmationem adducit ille testimonium Hieronymi ad Dan. 6. de vasis, quæ, ex templo Hierosolymitano abducta, *quamdiu in idolio Babylonis fuerunt, non est iratus Deus (videbantur enim rem Dei, secundum pravam quidem opinionem, tamen divino cultui consecrasse) postquam autem hominis*

hominis usibus divina contaminantur ,  
 statim pœna sequitur post sacrilegium.  
 Nec non Augustini: qui existimaverit  
 auctum a Deo imperium Romanorum ,  
 quod cordi illis fuisset quamvis falsa re-  
 ligio; & quod summum hominis officium,  
 etsi non re ipsa; tamen proposito tene-  
 rent, ut ex Lactantio additur. Eodem  
 etiam modo rectè puniri eos, qui falso  
 sibi vatum nomen induant, affirmat. m)  
 Quibus & illos annumerat, n) qui aut  
 cacodemonas, quos tales esse norunt,  
 aut vitiorum nomina, aut homines,  
 quorum vita fuit flagitiis plena, divinis  
 honoribus colere instituant. nec non eos,  
 qui Deos colant hominum innocentum  
 sanguine: à quo more quod Carthagi-  
 nenses abstinere coëgerint, laudantur  
 Darius Persarum Rex & Gelo Syra-  
 cusarum Tyrannus.

k) Cit. Ant. lib. & cap. §. 51. l) Ju-  
 stinus 8. c. 1. m) in annotatis ad prior. lo-  
 cum. n) §. 47.

## §. XI.

Ad hanc autem quæstionem, ut  
 mentem

mentem meam, hoc circa negotium aliquanto vacillantem, & ductoribus pæne destitutam aperiam, aliud profecto nihil respondebo, quam quod antea attigi, & mihi semper fixum manet: pœnam istam eo modo sumendam, mutuo rerum-  
publ. nexui repugnare: nec non Dei injurias ipsimet curæ; & impio satis esse, eum, cujus jurisdictionis sit, habere ultorem. Atque quoniam ad rectum judicium duo requiruntur, nempe & justa causa in crimine & legitima facultas in iudice: prior quidem apud eos est, posterior autem in solo Deo. Ex hoc enim, quod ipse totius orbis Dominus, quæcunque voluerit, ultus sit aliquando crimina, arguere, quod nos id ipsum in omnibus infidelibus possimus; perinde est ac si arguas, quod, cum rex possit in toto suo regno universos maleficos extirpare, possit pariter unusquilibet magnatum, qui sub illo jurisdictionem

nem habent ; territorium alterius ingredi ad id exercendum munus.

o ) Deinde multum ambigo, an ulla usquam gens detur tam fera ac impia, quæque adeò irreverens in Deum suum exstet : licet Phocenses extremo non solum necessitatis, sed & desperationis casu eo atrocitæ processerint : quamobrem factum eorum non tantum ipsis, propter sacrilegium, execrationis aliarum gentium ; quantum invidiæ Thebanis, à quibus ad hanc necessitatem impulsæ fuerant, attulit : quare etiam auxilia illis contra Thebanos miserunt Lacedæmonii & Athenienses, testante Justino. Si qua vero daretur, esset certè signum vel cognitæ stultitiæ suæ & detecti circa religionem erroris, vel denique divinæ traditionis in pejorem sensum ; idoque sufficiens pœna foret sua ipsorum miseranda fors vel conscientia. Ad Vates quod attinet ; ut non perfecti alicujus cœtus, ita non

non hujus considerationis sunt. Ceteros autem, puta dæmonum cultores, & innocentium hominum sacrificatores, atque ejus generis plures, quia non ex voluntate, secundum quam de bonitate & malitia morali in foro humano judicandum, sed ex ignorantia quadam, & judicio de rebus perperā formato agunt; ut firmiora & prius adducta argumenta, quæ huc etiam maxime spectant, hic subtexeam; bello plane liberandos puto. Postremo forsitan neque id prætereundum, quod de hominum victimis habet Tertullianus. *p) Sed enim Scytharum Dianam, aut Gallorum Mercurium, aut Afrorum Saturnum, hominum victimam placari apud seculum licuit, & Latio ad hodiernum Jovi media in urbe humanus sanguis ingustatur; nec quisquam retractat, aut non rationem præsumit aliquam, aut inestimabilem Dei sui voluntatem. si noster quoque Deus propriæ hostiæ nomine martyria*  
*sibi*

*sibi depostulasset, quis illi exprobrasset  
funestam religionem & lugubres ritus  
& aram, rogam & pollinctorem sa-  
cerdotem, & non beatum amplius repu-  
tasset, quem Deus comedisset.*

*o) Sotus lib. 5. Quæst. 3. Art. 5. p) in  
Scorpiace p. 624. N. 7.*

## §. XII.

Disputari etiam solet de Barbaris,  
& quidem paulò fusiùs, annon ideo  
possint a Christianis bello impeti,  
quia sunt infideles, seu quod idem  
est, annon infideles res suas injuste  
possideant, in quantum eas à Chri-  
stiana Ecclesia amittere jussi sunt,  
& consequenter, an ne illis bona  
possint per violentiam auferri? Ubi  
non quæstio est de iis, qui jure &  
facto subsunt Christianorum juris-  
dictioni, & in provinciis eorum  
habitant, vel imperium eorum, pro-  
vinciis suis occupatis, admiserunt.  
Hi enim arbitrio Christianorū Prin-  
cipū suas res possident, nisi limitatū  
imperium fuerit, atque ideo tan-  
quam



quam imperium & leges recusantes iis privari & bello impeti possunt, non præcise quia infideles sunt, & Christianam fidem suscipere nolunt, sed quia reipublicæ æque ac ecclesiæ conservatio ita requirit; vel saltem possunt Reges Christiani edicto jubere, ut infideles vel Christianorum provincias dimittant & ab eis discedant, vel Christianam fidem suscipiant. Verum hic quaeritur de jure ecclesiæ in gentiles externos, qui neque facti subditi, neque illi sunt infesti. Fuerunt, & quidem plurimi, qui tale jus tribuerent Papæ Romano, tanquam temporali monarchæ totius orbis, à quo omnium principum secularium potestas derivata sit, sive, eo interveniente, à Deo. Quod si vero Papa non exercent jurisdictionem in temporalibus, ut ajunt, extra patrimonium ecclesiæ, non esse id propter defectum auctoritatis, sed ob vitandum scandalum & nutriendam pacem. Argumentorum vis  
hisce

hisce continetur : quod 1. Papa sit vicarius Christi in terris, cui omnis potestas data in cælo & in terra. 2. quod dati sint illi duo gladii h. e. potestas & spiritualis & temporalis. Sic etiam Imperatorem Romanum totius orbis Dominum statuerunt, utpote cui alterum gladium Pontifex ille tradiderit; illud confirmantes cum necessitate & utilitate reipublicæ Christianæ, tum similitudine apum, quorum unus est princeps, & gruum, quarum unam sequuntur ceteræ. Ut hic nihil ex eorū sententia proferam, qui exemplum sumunt de Cæsare Augusto, & argumenta petunt ex dictis Luc. 2. & Luc. 20. Horum refutationem, cui volupe fuerit, videat apud Franciscum a Victoria. *q*) Dominicum Sotum. *r*] Covarruviā *s*) & alios; ego enim ne in his multus sim, ipsa facit evidentia rei.

*q*) *Relect. V. Sect. 2.* *r*) *de Just. & Jur. lib. 4. Qu. 4. Art. 1. & 2.* *s*) *de peccato. Rel. par. 2, §. 10.* §. XIII.

## §. XIII.

Eas solummodo asseram ratios,  
 es, ob quas præcipuas apparebit,  
 infideles dominio suo non carere,  
 et fidelibus jure aut facto, neque  
 sua proprietatem rerum, neque  
 sua jurisdictionem subjectos esse.  
 Infidelitas non privat infideles i-  
 tis prærogativis, quas habent jure  
 gentium, & *quæ non fidelibus tantum,  
 sed & omni rationabili creaturæ com-  
 petunt.* t) Quod exemplis Nabucho-  
 lonosoris aliorumque patet, qui-  
 bus, licet infidelibus, Deus regnum  
 & fortitudinem & gloriam dedit. u)  
 quò pertinet etiam illud Christi: *ὁ  
 πατήρ ὁ ἐν ὕψανοῖς τὸν ἥλιον αὐτὸς ἀνα-  
 τέλλει ἐπὶ πονηρὰς καὶ ἀγαθὰς, καὶ βρέ-  
 χει ἐπὶ δικαίους, καὶ ἀδίκους.* x) 2. Est ini-  
 quum, si vel non justa fiant, vel,  
 quæ justa sunt, non juste fiant, se-  
 cundum illud: *juste, quod justum est,  
 exsequeris.* Imperium autem in il-  
 los, nullo Dei jure præceptum, ex-  
 exercere iniquum plane est. De jure  
 F enim

enim naturali manifestum est ad legem verò positam quod attinet, neque quicquam hujus generis in veteri fœdere continetur, neque Christus usquam in novis dominiis aliud disposuit, præter illud: ἀπόδοτε τοῖνυν τὰ καίσαρος, καί

σαρι. γ) Quo ipso magis firmatur Cæsaris imperium, quamvis ethnicus esset, quam in minutum fuit

3. Aperte negavit Christus regnum suum esse de hoc mundo; & Apostolus: τί γάρ μοι τὰς ἔξω κρίνειν; τὸ δὲ ἔξω ὁ θεὸς κρίνει. 2) 4. Exinde probari potest, Deum non tale jus &

imperium concessisse, quod illud foret maximum impedimentum suscipiendæ veræ religionis; quemadmodum jam factum scimus in Japonia, cujus incolæ, simul ac de potestate Papæ audiverunt, omnes Christianos, ceu infestissimos hostes odisse, & à terminis suis excludere cœperunt. 5. Si tantum licentia

reipublicæ in rempublicam tribuamus, nihil aliud agimus, quam ut

brev

reui universum terrarum orbem  
 perturbemus, & discordiis ac cædi-  
 bus impleamus. 6. Israelitæ ob so-  
 lam idolomaniam, seu gentibus, qua-  
 talibus, nunquam bellum intule-  
 runt; quod exemplum quia plenio-  
 ri explicatione eget, hîc differo.  
 7. Illud denique adjungi meretur,  
 quo titulos falsos claudit Franciscus  
 a victoria: scilicet *dato, quod Domi-  
 nus perditionem barbarorum facere  
 constituisset, non tamen ideo consequi-  
 tur, quod ille, qui eos perderet, esset  
 sine culpa: sicut nec sine culpa erant  
 reges Babylonie, qui filios Israël duce-  
 bant in captivitatem; nec Jerobeam  
 recte avertit populum Israël a Roboam,  
 quamvis hoc factum fuisset permissu &  
 consilio DEI.*

i) Balthaz. *Ayala de officiis bell. l. 1.*  
 c. 2. §. 28. u) *Dan. 2.* x) *Matth. 5, 45.*  
 y) *Luc. 20, 25.* z) *1. Cor. 5, 12. & 13.*  
 §. XIV.

Manet adhuc quæstio, an ideo,  
 quia doctrinam Christi sibi prædi-

catam repudiant, debellandi sint barbari, ut devicti illam recipiant. Nimirum existimant nonnulli, illos teneri sub mortalis culpæ reatu, qui fidem sibi annunciatam, magnisque argumentis propositam non suscipiunt ac profitentur, adeo ut irreverentiæ & injuriæ peccatum in Deum comittant, illam detrectantes; principes vero Christianos, qui ministri Dei sint, & vindices eorum, qui mala patrant, posse contra eos jure belli agere. Deinde cogi posse barbaros, ut obediant principibus suis; ergo multo magis, ut obediant Christo, cujus causa non quidem peioris conditionis sit, quam hominum. Prætereà blasphemantes Christum, & rebus Christianis in ignominiam abutentes rectè debellari, ut absistant ab illis blasphemis; eodem plane modo, ac si injuriam faciant Regi Christiano, etiam defuncto: multo autem magis, si Christo, qui est Rex vivus Christianorum.

stianorum. Jam vero majus peccatum esse infidelitatem, quam blasphemiam; esse videlicet abnegationem, & contemptum fidei nostræ, a) & radicem vitæ turpioris omniumque peccatorum. Laudat denique Gregorius bella, quæ Gennadius gesserat adversus infideles, dilatandæ reipublicæ causa, quatenus Christi nomen per subditas gentes fidei prædicatione circumquaque discurreret. b).

a) *Franc. Vict. rel. 5. Sect. 2. N. 67.*

b) *Covarruvias Regul. peccat. relect. par. 2. §. 10. N. 1.*

### §. XV.

Hic autem titulus redigendi barbaros ad subjectionem, tantundem valet ac titulus *infidelitatis*, de quo modo egimus. Naturâ enim eorum ita comparatum est, ut primo annunciati credere nequeant, cum ignorent qui & quales sint, qui istam religionem sibi proponunt, & falsam tantisper præferant. Idcirco,

co, etsi oportebat eos per rationis lumen, quæ ad Creatoris sui cognitionem & suam ipsorum salutem adipiscendam faciant, omni nisu inquirere, exaudire & animo revolvere: tamen id negligentes coram hominibus neque injuriæ incusari, neque ab eis puniri debent, maxime cum Deus, cujus majestati injuria inferitur, dicat; *ipse retribuam*. Unde Franciscus a victoria: *Si Saraceni eodem modo proponerent barbaris sectam suam simpliciter, sicut Christiani, non tenerentur eis credere, ut certum est: ergo nec Christianis sine aliquo motivo & suasionem propollentibus, quia non tenentur, nec possunt divinare, utra sit major*. Cum vero huic rationi permoventi obicem ponunt, sequendum est Christi monitum, qui Apostolos suos ita emisit: Καὶ ὃς ἐὰν μὴ δέξηται ὑμᾶς μηδὲ ἀκέσῃ τὰς λόγους ὑμῶν· ἐξερχόμενοι τῆς οἰκίας ἢ τῆς πόλεως ἐκείνης, ἐκτινάξατε τὸν κονιορτὸν τῶν ποδῶν ὑμῶν. c) Bellum enim quod



quod nihil aliud quam licentia nocendi adversariæ parti reputatur, nullum est argumentum pro veritate fidei Christianæ, quo possint moveri ad credendum, sed odii & timoris plenum, quæ requisitis recipiendæ religionis maxime contrariantur. Scilicet religio est intellectus & voluntatis negotium, atque insigne donum Dei, ita ut argumentis doceri debeat, nec nisi Dei gratia propagari, ac solius verbi divini virtute persuaderi possit. Hinc recte scripsit Josephus à Costa citando Gregorium: *Qui fidem asperitatibus propagare volunt, suas magis, quam DEI causas probantur attendere. Tota enim ista res vergit in obstinatum quandam invidiam & odium fidei, & certam perniciem hominum. d)* Et Tertulianus: *videte enim, ne & hoc ad irreligiositatis elogium concurrat adimere libertatem religionis, & interdicere optionem divinitatis, ut non mihi liceat colere, quem velim, sed cogar colere,*

*quem nolum. Nemo se ab invito coli vo-*  
*let, ne quidem homo. e)* Divinus et-  
 jam Præceptor emissis in medium  
 luporum, increpans severitatem  
 nonnullorum ex apostolis, quam-  
 libet ita lenitatem eis commenda-  
 vit: *ἐκ ὁδοῦτε οἱς πνεύματος ἔσε ὑμεῖς.*

*ὁ καὶ υἱὸς τοῦ ἀνθρώπου ἐκ ἡλ.θ. ψυχὰς*  
*ἀνθρώπων ἀπολῆσαι, ἀλλὰ σῶσαι. f)*

Non est ergo quod quis objiciat,  
 fatius esse per vim salvos facere,  
 quam per indulgentiam perire per-  
 mittere. Ad quod præterea respon-  
 det pulchre Augustinus: *Illis blan-*  
*diendum est ut credant, in vobis putredo*  
*hæc refecanda est. Non tollo idola il-*  
*lorum, quia non habeo in illos potesta-*  
*tem. g)* Hinc imperatores Christia-  
 ni laudantur, quod in bellis quoq̃  
 ex causis justis non vim religionis  
 ergo propagandæ intulerint consci-  
 entiis victorum. quorum tamen  
 præclara exempla, perinde ac alia  
 nonnulla, quæ huc egregiè facerent,  
 sciens præterire cogor.

*c) Matth.*

c) *Matth. 10. 14. Luc. 4. 5.* d) *Apologet. n. 24. p. 26.* e) *Luc. 9. 55.* f) *Joseph. a Costa lib. 2. de procuranda Ind. Sal. c. 4.* g) *citante eodem cap. 2.*

### §. XVI.

Ex iis, quæ jam dicta sunt, facile cognosci potest, quid de ceteris causis sit tenendum ; si quærat, an propter spem conceptam, ex aliqua divinorum vaticiniorum explicatione, vel an propter metum, aut propter curam Regum generalem, ad humanitatem & religionem bellis barbari sint adigendi. Ad hæc enim illa etiam valet responsio, quod sine expresso DEI præcepto, aut illatâ injuriâ, juste id ipsum fieri non queat. Et quod ad oracula implenda attinet, latent nos rerum tempora, *cum DEus, quæ prædixit, sæpe per improbos homines, aut pravas actiones ad exitum ire permittat k).* Bellorum autem exitus quia incertus est, ac tumultibus illorum non solum profana quæque, sed & spiritualis

spiritualis reipublicæ salus, & sacra omnia, fidesque ipsa periclitantur: l) consultius fortassis foret, si, quisquis stat, provideret, ne caderet, hoc est, si innocentibus parceret, atque non vocatus quiete & pacate ageret. Nec est, quod aliter de metu sentiamus, nisi certa evidensque sit, & justitiæ sufficiens, animi eorum hostilis æquè ac potentiæ ratio. Modi enim cavendi recti iudicioque gentium approbati esse debent, non à vi, sed ab innoxia cautione repetendi, adeo ut qui ex solo metu belli argumenta sumunt, ex sua libidine jus fingere recte dicantur m). Aliud autem est, *si gentem aliquam Christiano nomini infestam esse constat, & ad illud delendum semper intentam; quidni enim tunc liceat, cognito hostili animo, bello eam aggredi, & victoria ita uti, ut abolitis paganiis Christiana religio introducatur?* n) De cura Regum, quam generalem pro societate humana illis incumbere Grotius opinatur,

opinatur, nihil superest, ut addam, cum ex superioribus, quæ mens nostra sit, facile intelligatur.

*k) Grot. lib. 2. c. 22. §. penult. l) Dom Sotus. m) Reinh. Theatr. Prud. Eleg. lib. V. c. 4. §. 19. n) Bæclerus Vitekind. p. 5. §. XVII.*

Hic etiam, quia de peccantibus in religionem sermo est, possit fortèan aliquis à me exoptulare, ut, quid de hæreticis habendum sit, edisseram. Verum, quum ea non proprie sit hujus loci tractatio, & tamen ex his, quæ nunc breviter disputata sunt, quid hoc in negotio statuere æquum sit, colligi utcunque possit: ne aut multus in ea re, aut prorsus negligens fuisse videar, id solummodo monebo, quod hæc eadem, quæ de barbaris dicta sunt, pro hæreticis disputari ac defendi possint, contra Covarruviam & alios. Illius enim verba sunt: *Tametsi ecclesia valeat punire eos, & bello persequi, qui semel Christianam religionem*



auguriis, arcanis cerimoniis, oraculis superstitiosis atque immolationibus utebantur, ab aulicis fuit prohibitus, quippe qui potius correctioni & pœnitentiæ locum concedendum dicerent *p*).

*o) cit. loc. num. 2. p) Kromaj. Hist. Eccl. Cent. 9.*

### §. XVIII.

Ut igitur tam nefaria tamque impia religio nulla est, quæ jubeat in homines diversæ religionis latrocinium exercere; ita impuri & facinorosi hominis est, per simulationem contemptæ aut violatæ religionis alterius bona prædari: & *religio nec ut prætextus, nec ut instrumentum crudelitatis inservire q*); sed jus tantummodò lætum pro justa belli causa prætendi debet. Seu quod idem est, justo bello ex iis tantum causis, cum infidelibus, ex quibus cum aliis quibuscunque contenditur. Nec est, quod quis excipiat, bellum ex utraque parte belligerantium

rantium justum esse posse; cum hostes, qui contrarii sunt, contrarias omnino causas habeant; ut, si opinione, non tamen veritate bellum utrinque esse possit justum r). Quod si ergo non pacatè vivant barbari, sed moratiores offendant, eosque aut latrociniis, aut alio aliquo modo persequantur; non dubium est, quin armis immanitas vindicanda sit,

*Armaque in armatos sumere jura sinant.*  
 Atque eo modo non solum propriam rempublicam, sed & socios, & fidei etiam consortes, defendere ob caritatem Christianam convenit. adhæc quibuscumque injustè oppressis, opem nostram petentibus, ut opitulemur, commune naturæ vinculum efflagitat. Sic ex quo Juris Naturalis præcepto pacem dixi colendam cum barbaris, ex eodem quoque justam eorum, quæ à barbaris injuste ablata sunt, quamdiu jus in ea reservatur, recuperationem



perationem derivari evidens est :  
 quæ, si per clarigationem nequeat,  
 necesse est armis obtineatur. Adeò  
 nullum discrimen est inter Chri-  
 stianum & infidelem, quâ bello ad-  
 oriendos, quia neutrum eorum si-  
 ne illatâ injuriâ bello aggredi fas  
 est. Quinimo, quominus quis-  
 quam contra ferocem & iniquum  
 Christianum cum infideli, si sic  
 necessitas suæ defensionis urgeat,  
 & prudenter fiat, arma jungere  
 queat, neutiquam sacrorum cum  
 isto communio impedit s). Hisce  
 igitur jam positis, utantur reges  
 duobus illis nominibus, pace &  
 bello, ad id, quod justum est;  
 non, tanquam nummis, ad id so-  
 lum, quod aut expedit, aut oblectat.

q) *J. Frid. Reinh. Tb. Prud. El. lib. 4.*  
*c. 3. §. 3. not. 2. r) Balib. Ayala lib. 1.*  
*c. 2. §. 35. s) vid. Zentgr. de orig. J. G.*  
*Art. IV. §. 17.*

Hæc momenta sunt, quæ de  
 armorum justitia adversus barba-  
 ros,

ros, Tuo, Candide Lector, examini  
 pro more Academico nunc submit-  
 tere sustineo. Quod si divina fa-  
 vente gratiâ fieri possit: ea, quæ  
 adhuc desiderantur, nimirum de  
 bellis sacris, accessura spero. Hi  
 autem defectum ingenii mei & eru-  
 ditionis, quia ingenuè fateor, & sub-  
 misse oro, favor tuus supplebit.

*Omnipotens rerum Moderator & In-*  
*duperator,*

*Divite qui nobis dextrâ bona cuncta*  
*ministras,*

*Da bene nôsse, fiet Tua quæ divina vo-*  
*luntas!*

*Barbariei tenebras per cunctas discute*  
*terras;*

*Omnibus ut fidei splendescant lumina*  
*veræ!*

*Fac seri maneant in religione nepotes*  
*Salvificâ, qualem præstant nunc mœnia*  
*nostra!*

*Sint Tua cura Pater Patriæ, rerumque*  
*Potentes;*

*Ut quærant semper, quæ sint regionis*  
*& urbis*

*Commoda*